



太清神鑑

欽定四庫全書提要

太清神鑑六卷舊本題後周王朴撰乃專論相法之書也考朴事周世宗爲樞密使世宗用兵所向克捷朴之籌畫爲多歐陽修新五代史稱朴爲人明敏多才智非獨當世之務至于陰陽律法莫不通焉薛居正舊五代史亦謂朴多所該綜星緯聲律莫不畢殫然皆不言其善于相法且此書前有自序稱離林屋洞下山三載徧搜古今集成此書考朴家世東平入仕中朝遊跡未嘗一至江左安得有隱居林屋山事其爲依托無疑蓋朴以精通術數知名故世所傳奇異詭怪之事往往皆歸之于朴如王鉅默記所載朴與周世宗微行中夜至五

更河旁見火輪小兒知宋將代周其事絕誕妄不可信而小說家顧樂道之宜作此書者亦假朴名以行矣然其間所引各書篇目大都皆宋以前本其綜核數理剖析義蘊亦多微中疑亦出宋人非後來術士之妄談也其書宋史藝文志不載諸家書目亦罕著錄惟永樂大典頗散見其文雖間有缺脫而掇拾排比猶可得十之七八謹哀輯成編釐爲六卷朴之名則削而不題以祛其僞焉



# 原序

至人無體妙萬物以爲體至道無方鼓萬物以爲用故渾淪未判一氣湛然太極纔分三才備位是以陰陽無私順萬物之理以生之天地無爲輔萬物之性以成之夫人生居天地之中雖稟五行之英爲萬物之秀者其形未兆其體未分卽夙具其美惡蘊其吉凶故其生也天地豈容巧於其間哉莫非順其世循其理輔其自然而已故夙積其善則賦其形美而福祿也素積其惡則流其質凶而處天賤此其灼然可知其確然不易也是以古之聖賢察其人則觀其形觀其形則知其性知其性則盡知其心盡知其心則知其道觀形則善惡分識性則吉凶顯著且伏羲日角黃帝龍顏舜目重瞳文

王四乳斯皆古之瑞相見之間降之聖人也其諸賢愚修短  
猶之指掌微毫絲末豈得逃乎故相論形神之術自此而興  
焉其來極多其論至冗許負袁天綱陶隱居李淳風之後不  
可勝計然皆窮幽探蹟得之至妙其或紊亂所說或異或同  
至使學者不能貫於一致余自穉歲潛心於此考古驗今無  
不徵效遂特離林屋洞下山三載徧搜古今考之極元者集  
成一家之書目之曰太清神鑑以其至大至明形無不鑑至  
清至瑩象無不分然未足奪天地賦形之機亦可盡人之性  
形耳謹序

太清神鑑卷一

守山齋書目

失名

說歌 道爲貌兮天與形

默授陰陽稟性情陰陽之氣太

眞

人倫風鑑云陰陽之氣氛氲

化出塵

幾幾樣人五嶽四瀆皆有神金木

水火土爲分君須識取造化

理相連始可論人倫貴人骨格

定奇異看之乃爲神仙鄰若非古怪卽清秀若非端正卽停

勻

人倫風鑑云丰姿不嫩仍端異

骨格灑落松上鶴

清

頭角挺特眞麒麟

古

森森修竹銷流水

秀

峩峩怪石收閒雲

怪

崑山片玉已琢出

端

南海明珠光照室

異

夭桃繁杏媚春華可憐容易摧風日

嫩

坐中初看似昂藏熟視稍覺無晶光語言泛泛失倫序舉

動碌碌多倉忙若人賦得此形相薄祿爲官不久長坐中初

見似塵俗熟視稍覺多清涼議論琅琅悉可聽容止悠悠而  
細長若人賦得此形相高名美譽攬金章更看面部何氣色  
數中惟有火多殃青多憂撓黑多病白多破財黃乃昌湛然  
沈靜無瑕翳青雲萬里看翱翔富貴貧賤生處定但把形神  
來取正一部吉兮吉必生一部凶兮凶必應部位吉凶各有  
主存神定意詳觀聽妙理不過於五行當究五行之正性木  
瘦金方乃常談水圓土厚何須競不露不麓不枯槁三停大  
體求相稱火形有祿終須破奔走貧寒多阻挫人倫風鑑云  
惟有火形尖  
更露縱饒得  
祿終多破雖因神秀暫榮華四十之上亦難過其餘相法

固非一天地收斂終無失氣和神定最有常骨聳頭寬根本  
實腰背端如萬斛舟瞻視盼顧如星斗肉隱骨中骨隱體色

隱神中神隱眸若人賦得此形相定知不是尋常流氣宇汪洋有容物智量深遠多權謀動作令人不可料時通亦自爲公侯易喜易怒屬淺薄易驕易滿屬輕浮淺薄輕浮神不定一生自是常常憂欲知富貴何所致馬面

人倫風鑑作馬耳

牛頭聳

鼻梁有聲有韻骨格清有頤有面含神光

人倫風鑑云起坐昂昂多神氣

欲

知貧者何所分面帶塵埃眼目昏出語三言不辨兩凹

人倫風鑑

作胸削背仍高臀赤脈縱橫貫雙眼殺人偷盜身無存人生

具體皆相同貴賤相近有西東沖和而上主輕清認其清者

宜高崇滯伏而下主重濁認其濁者皆凡庸清濁一分知貴

賤貴賤不離清濁中大道無形故無相此理原來本至公

人倫

風鑑云吉凶生於一念中

人能移惡歸諸善自然可以消災凶人能安分

委天命自然可以濟窮通

人倫風鑑云自然可以起凡庸叔教陰德故所勸上相相心今執同

予作此詩真有理寄信賢者莫怱怱

人倫風鑑何元經同

又歌

受氣成形三才俱備清則富貴濁則災否但看貴人

神清氣爽眉目秀媚骨要堅隆骨肉相繼骨謂之君肉謂之臣骨過於肉君過於臣此乃貴人常壽無速龍骨吞虎生必豪富虎骨吞龍一世貧窮下短上長富貴吉昌上短下長遍走他鄉面黑身白位至相國身黑面白賣盡田宅面鰐身細一生富貴面細身鰐貧困而孤額聳而隆不受貧窮額方而廣有田有莊額骨而高必爲僧道額上有紋早年艱辛若是女子夫位難停額窄眉深賣盡資金額有伏犀不富則貴眉秀而清四海聞名眉如初月衣食不缺眉骨而高長受波濤

眉有旋紋父母不停八字眉分一生孤貧眉頭相連壽短不

延眉生纖毛上壽堅牢眉硬如錐晚歲饑棲兩眼藏神富貴

高名魚尾插額位至相國睛色有黃爲人不良若是紅紫刀

劍中亡斜視如流爲性姦偷三角有光賊性難防四白羊睛

殺子不停反視鬪睛爲性不平睛露臉高促壽不超鼻頭圓

紅不受貧窮若要清貴年壽通隆鼻梁曲陸一生孤獨鼻如

鷹嘴啄人腦髓鼻梁骨橫實盡田園人倫風鑑云破盡平生鼻有縱紋

剋子不停鼻頭素紫晚年窮死口紫而方廣置田莊人倫風鑑云口

如吹火孤寒獨坐口上有紋失約無成口薄而輕親業如傾露齒結

喉走遍他州耳有垂珠富貴雙居人倫風鑑云衣祿有餘輪廓皆成一

世豐榮人倫風鑑云耳內生毫壽永年高耳生黑子多招是非鼻梁耳返賣盡田產耳

如箭翅貧窮破祖耳聾而朝富貴年高髮疎而細位過兩制  
髮麓如麻貧窮可嗟女人髮拳尅夫連綿婦人髮黃遍走他  
鄉手如喫血衣食不缺手軟如綿衣食自然手紋如絲必爲  
賢士手紋橫生不聚資金紋如鐵斧法死衆覩

人倫風鑑云  
紋如戈矛法

死不

留手上露筋一世艱辛聲如破鑼田產消磨聲鴨聲暗家

計如傾聲如大鏡一世波濤舌上有紋牛馬成羣舌如紅蓮  
廣有田園舌短唇長晚歲荒忙足下有紋大旺子孫足有龜  
紋一世清名足下黑子富貴賢士曲背駝腰子孫不超鴨步

驚行富貴家榮

人倫風鑑云  
富貴清名

行若蛇行親業如傾蛇胃鵲筋

人倫風鑑云  
蛇骨鶴筋

貧窮賤人頭大有尖富貴長年頭大無肩晚歲

孤寒身大頭小壽數極天三停不直不爲貴格南人北形富



貴高名北人南形產業如傾男人聲雌破却家資女人聲雄  
夫主不停眼下乾枯定殺五夫齒露聲雄殺夫貧窮更若有  
鬚不可同居形容如鬼殺夫不已面如哭形家業不成面上  
生靨夫位高判形寒額尖夫位須死若是男子亦復如此人  
中黑子主養飽子口上生者吐血而死淚堂生痣子孫難繼  
黑子口傍是非難防蘭堂生者富貴壽長眼下併紋子息難  
成縱理人口餓死不久法令入頤一生富貴紋入承漿壽限  
高強令紋傍口財帛難守鼻準有紋溺水而死骨怯神怯三  
犯須傾形重骨剛壽命延長三停隆直富貴無敵行步身斜  
破親亡家腦有玉枕九十爲定鼻梁不正四十絕命鼻曲唇  
掀壽夭不延

人倫獨步

肥人結喉壽短不留帶殺雙兼惡

死居前有胷有背富貴無窮有背無胷晚歲孤窮

人倫風鑑云有胷無

背貧賤如流

聲音如嘲貧賤不貴身小聲雄位至三公身大聲小

早歲折夭此法祕之如金如寶

人倫風鑑云千字文同上

相法妙訣

相人形貌有多般須辨三停端不端五嶽四瀆

要相應或長或短不須論額要濶兮鼻要直口分四字多衣

食頭圓似月照天庭眉目彎彎多學識眉頭昂而性必剛縱

理重重入天倉下視之人多毒害羊睛四白定孤霜鼻頭屈

曲多孤獨項短結喉神不足男面似女女似男心慳藏事多

淫慾眼眇雖有小精神更觀黑白須分明遠視有威近秀媚

披緇學道好音聲眼精黑少白多惡

王管照神云黑白分明定知畧

眉長眼

細足人情眼睛若露唇皮反男憂惡死女憂產若是頭圓須

出家

玉管照神云若還不是出家人在私必定遭天難

耳無輪廓多破散

玉管照神云耳無輪

廓破紋多細小無珠命短薄

耳若聳長有輪廓衣食自然終不薄

玉管照神云身

與腰相應著忽若偏時終薄落

頭大身小性慳貪身大頭小多消索坐要端

兮立要直不直不端無見識先笑後語定非良不言不語人

難測面上看來眉不同一上一下形如蟲如此之人若與交

眷屬之人亦不終仔細看之須尋古但看金木水火土相刑

相尅定取形若也相生須得地人中斜曲主橫死上唇牽露

多辛苦左眼小而右眼高父母必定幼年拋右眼小而左眼

反家財宮中多破散更須看眼與單重再拜父母添宗族南

人似北多富貴北人似南只有名有背自然能負荷學堂學

館廣中親何須眉目定其貴先看骨兮次看肉骨肉兩般事

更別清亦貴兮濁亦貴真濁真清方始貴若還認得濁中清

早當食祿歸官位清怕浮而濁怕實更怕眉尾麤是一

玉管照神

陳搏先生袖裏金同

又云面圓人亦好更審聲音語須小如此之人若

與交面前背後心難料大凡相法識根源金木水火土相連  
相尅相刑多破敗忽若相生富有年

神秘論

人之所稟在精神以火爲神水爲精火本藏心心

爲志精備而後神方生神生而後形方備形備而後色方明

是知色隨形所生氣乃逐聲各有形有形不如骨有骨不

如有神有神爭如有氣神之得氣旺於春大都神氣賦於人

神氣若油人若燈神安自然精可實油清然後燈方明夜宿

此心如寂寂日居於眼覺惺惺有時又有清中濁有時又有

濁中清更兼風韻細數藏坐久凝然力轉強如此之人堪立  
事輕浮淺薄便尋常其次更看形與骨骨細皮膚軟而滑要  
觀生就與未就旋有旋生終可久或然未好已先盈花未開  
而實已生老人不欲似後生老者應須要老成男子不欲帶  
女相女人不欲似男形陰反爲陽夫早死老懷嫩色壽星傾  
丈夫女子兩般評女要柔兮男要剛女人屬陰本要靜未言  
先笑定非良良人有威而少媚媚婦有媚而少威令人一見  
便生侮所以居身在至微木要瘦兮金要方水肥土厚火尖  
長形體相生最爲吉若然相尅定爲殃金得金剛毅深木得  
木資財足水得水才學貴火得火威武播土得土多倉庫金  
不金反沈吟木不木多孤獨水不水多官鬼火不火多凶禍

土不土多辛苦

形論已上

只於形體本先瘦

木

次後初肥最爲要

水生

若然始瘦又枯乾木帶金兮災愈繁一如形體本方正

次後背隆最爲應

金土生

若然始方却又尖金見火兮實爲災

初中最好末生災腰臀都小步不開初中不好末生好腹肚

初生懸壁倒有臀有背能負荷無背無臀空老大看前雖好

未爲好看後須好好到老馬上大兮馬不小更兼藏氣與藏

神八座三臺官豈小有財之人面似方有土之人多在背

土守

其在清資併極貴面似月兮身似貝有時舉眼隨身起有時

接語如身轉近觀有媚遠無威久視方明初似晦更有一法

何所謂只有鋒鋸始爲貴器宇瀟灑風韻美如此之人豈常

類信知顴骨有四般入耳無邊壽數寬插上天倉須兩府髮

鬢之下當守土清奇古怪秀異端七者爲身亦合論清而無神謂之寒奇而無神安有官古若無神謂之俗怪若無神乃主辱秀而無神謂之薄異若無神多削弱端而無神謂之麤七者有神乃衆殊遠視之人心必遠視高之人心必高視平之人心必善下斜偷視主心豪眼睛若露終凶死精神矍鑠亦徒勞須知眉平眼又平必然爲道又爲僧紫衣師號如何得伏犀骨肉頂中生眉眼多生神殺現縱爲僧道不成名少年得第踏青雲眉目分明氣骨清眉目分明氣骨俗只有文章豈有名更有一般行尸肉須看肩高與頭縮要知南人面似北身大而肥有水色欲知北體似南人體厚形小氣薄清南人似北終須富北人似南終享榮富人不過厚其形貴者

當論骨與神貴在於眼富在耳貴人同富誤於人不貴似貴  
終須貴不貧似貧終須貧貧中得貴因何識看取驛馬先生  
骨富中反賤又何分胷高骨寒神太昏借問相中何取壽認  
取聲名骨又秀若或氣短骨又露四十之前壽必故耳要白  
兮口要紅眉清目秀鼻如筒更兼六府相朝揖富貴一生到  
老終鼻梁深兮山根折少哭尊親并骨肉弟兄無一眉龜短  
耳無輪廓主無兒更有一法須要識結喉露齒主妨妻大凡  
須看氣與色色浮皮外氣居皮皮外者色皮內者氣來時如蟹去牽絲  
去似馬尾將欲撒爲福定隨日影去爲災直須終日聚不拘  
青黑與紅黃但認發之在何處若能依部以看之足知爲善  
與爲惡稱意之人何所識看取三光并五澤

三光兩目上鼻  
金聳兩耳珠準



頭爲澤印堂  
兩金併地閣

若還諸事不如心其位自然皆暗黑形滯之人  
行步重神滯之人聲必硬色滯之人面塵埃飛禽走獸有數  
般莫將禽向獸中看瘦長但向禽中取肥短之人以獸觀似  
虎之人取其項似犀之人取其背鳳要眼長鶴身削似禽不  
嫌身瘦小似獸若肥最爲要禽肥必定不能飛獸若肥兮安  
能走吁嗟流俗不知因要知飛走取其形若人正形須大貴  
依稀相似出羣人曰角龍文雖謂奇所謂不吉仍何爲三尖  
五露不入相所爲若善福相隨若不以心而論相是將人事  
逆天時若還人心相應相相逐心生信有之大凡微妙不難  
識要在心通與眼力但將此論細推之長短於中無不得

人倫

風鑑  
同

成和子統論

成和子曰子常內收視反聽一無所有縱觀

萬物見富貴貧賤之不同未悉其誰與之耶識者曰必造物與之也見吉凶壽夭之或異未悉其誰與之耶議者曰必造物與之也如是則物爲其所者固碌碌矣而造物者豈真聽之也求其端方其理是豈偶然哉其所以不同者皆出於自運自化故有造物者主之而已若夫於其一無所有則內焉與道同體外焉與造化者同功而造物者又焉能去之也且

其形於天地之間爲形相異生死榮辱循環無端

玉管照神云不能見

道所以出生入死如循環然故造物者得而主之也

其間不失其本可以語道爲貴人

其庶幾焉如知所謂貴人者何來其故有自來也希夷子問成和子曰請言其來所自成和子曰其來有五有自修行中

來者有神仙中來者有星辰中來者有神祇中來者有精靈  
中來者希夷子曰可以形相別乎成和子曰可形貌清古舉  
動恭謹性善氣平言極至理雖在朝廷常有山林之趣此修  
行中來者形貌灑落舉動風雅性惠氣和言涉方術雖在朝  
廷常有修煉之志此神仙中來者形貌顯赫舉動嚴肅性明  
氣直言涉造化雖在朝廷常有脫塵之意此星辰中來者形  
貌奇異舉動急速性靈氣剛言涉威猛雖在朝廷常有祭祀  
之敬此神祇中來者形貌醜怪舉動強惡性酷氣暴言涉浮  
邪雖在朝廷常有殺伐之心此精靈中來者五者之中神祇  
精靈以威武爲貴者其性稍從善或增積善根亦可進乎道  
也夫人生在世固多般矣或爲碌碌仕宦或爲區區四民或

進或退或得或失或多歡樂或多憂惱或初貧窮而終富貴  
或始富貴而終貧窮或始貴而終賤或始賤而終貴或富貴  
而天或貧賤而壽或生於東南而旺於西北或生於西北而  
死於東南以至婚姻飲食交遊聚會不期而致如響答聲皆  
緣所作而受報未嘗有毫髮之差昧者由之而不知也希夷  
子問成和子曰可以形相分別使昧者可以避惡趨善是亦  
明之一端也成和子曰事有所行理有所言苟使人避惡而  
趨善當得陰報非惟凶咎自遠亦可以證來世之果報不深  
則形貌偏枯氣色雜碌骨雖起而不聳正面雖開而無肉故  
爲碌碌仕宦或眉疎而眼秀氣稍清則爲士或皮麤或肉重  
或氣混濁則爲農爲商骨巧而肉薄則爲工或氣散而色沈

故爲四民進退得失之不常蓋因形相之不全骨氣渾厚精神閒暇者多歡樂骨氣清薄精神露見者多憂惱形神正而氣色不開者始貧而後富氣色嫩而形神不藏者始富而後貧五嶽相朝而未開五星分明而未出者始賤終貴五嶽磊落而俱走五星分明而跼促始貴而終賤部位峻急氣色嫩而面光故富貴而天部位開伏氣色燥而深沈故貧賤而壽頤領連地閣而龍宮門常有潤色生東南而必旺於西北神光散入邊地而山林常有潤色雖生西北必死東南亦有西北之人旺於東南東南之人死於西北其驗者山林邊地之氣但由青黃黑白赤休囚衰旺而推之乃可見矣故婚姻之遠近貴賤就魚尾龍宮氣色看之食祿之遠近榮枯就官祿

驛馬氣色看之大凡氣色紅黃者爲吉黑白者凶發深則近發淺則遠氣色和則聚會交遊多喜氣色暴則聚會交遊多惡以至歷清要遭貶責受戮辱者若雖在眸子之瞭眊精神之秀媚未有不由用心之太過也希夷子曰至理之論不出於此竊見世人或以五行取形或以飛走取形未知孰是分三主九曜十二宮亦不可以見定說可得聞乎成和子曰人稟五行而生飲天之和食地之德未有不由乎五行因而取稟須識五行之性故能理其說而載於形以飛走取形則議物理自然之意如易之取象旣以天地風雷水火山澤之八物以象八卦又以牛馬龍雞豕雉狗羊以配之其爲物也微其取類也大以飛走取形亦如之其物之爲貴者莫過虬龍

鸞鳳龜鶴獅子狻猊之類其次則麟虎猿猴犀象牛馬凡此十類者之中均爲物也自有不同故虬龍一類有飛有蟠有病有懶鸞鳳一類有翺有翔有孤有饑虬龍則巖巉而身長鸞鳳則端正而眼細虬則小龍則大鳳爲雄兮鸞爲雌骨格似而神氣不正則取其飛蟠病懶翺翔孤饑之勢以況之鶴則清瘦而脰長龜則清古而眼雛二者靈物其形相類不求貴達亦當得道獅子則昂藏狻猊則小於獅子也猿臂長面圓猴則面瘦而眼圓牛則行緩馬則驟而急其大畧如此然正形故難得也此特取可貴者而言以至麋鹿彪豹狐鼠鴉鵲雞犬猪羊鶩鴨之類凡有生有性者皆得以取象非博物元機之士能觸類而推之亦難知矣蓋取形又不須全似

但以耳目口鼻行步趨向得其彷彿皆是也嗚呼知人難於知天矣天有寒暑之可期人有傾危則在於反覆之間天有晦明之可見人有容貌則在於深厚之間天有旦暮之可數人則有朝秉權要暮爲逐客朝處蒿萊而暮致青雲者實難知也惟用心若鑑之士則真僞不可逃也面有九曜鼻屬金眼屬木耳屬水口屬火面屬土左顴骨爲羅右顴骨爲計眉爲紫氣人中屬月字是也三主或自下而上爲言者或自上而下爲言者皆不足取以形之屬分可以無疑夫水生於天一金則生於地四金水形神者當自天庭至印堂爲初主印堂至準頭爲中主準頭至地閣爲末主土者興中央之正色發於中宮如土形人自準頭至印堂爲初主印堂至天庭爲



中主準頭至地閣爲末主更有兼形則取其多爲主又焉能  
逃此哉或曰面有十二宮印堂爲命宮天倉地庫爲財帛宮  
龍虎額角頭爲兄弟宮日月角爲父母宮三陰三陽爲男女  
宮懸壁爲奴僕宮魚尾爲妻妾宮神光年壽爲疾厄宮山林  
邊地爲遷移宮正面爲官祿宮精神地角福堂爲福德宮相  
貌則總而言也取形之理分三主九曜十二宮之法無以易  
此希夷子曰人生天地之間不止於百千萬億數其立身以  
殊豈可遍言之也能廣此意以觀人知窮易象乃可得也何  
得一爲喻成和子曰幽深微妙天之機也造化變移天之理  
也論天理以應人可也泄天之機以惑人天必罰之然而皇  
天無私惟德是輔惟善人是爲由是而觀則禍福無不自己

求之者人有常言雖有窮困而通否極而泰居困之時不能  
致命遂志焉可求通居否之時不能修德避難焉可求泰此  
易所謂貴乎藏器於身待時而動之君子也低視而心暗藏  
氣愚而色不和小人也

已上與玉管照神  
論五種相法同

大清神鑑卷一

太清神鑑卷二

雜說上篇 大貴之相有三曰聲曰神曰氣蓋聲清則神清神清則氣清驗此三者其形骨次之是以古者方伎之妙有聞人之聲韻而知其必貴者得之於神也有察人之喜怒操守而知其必貴者得之於氣也故聲欲響潤而長神欲精粹而藏氣欲舒緩而靜反此者不貴也若夫有聲而有神氣不應則其貴必遲有神而氣怯聲破則其貴不遠有氣而神聲慢未可言貴也此三者幽而難明元而難測惟意所解口莫能宣也

雜說中篇 形成而不可變體具而不可移大凡形體惟在完滿隆厚清潤崇重平正華秀不貴則富也若怪而麤古而

露清而寒秀而薄者皆非美相也古人論部位之法以額準頭地角左右顴爲五嶽以眼口鼻耳爲四瀆以上下分九州十二辰由此觀之則一形之微其所該也大又烏可淺淺而論哉故上自天子下至庶人其五臟六腑百骸九竅之形皆同然其所以爲形則異也若辨析之須於三停五行中先觀其要妙次求其部位氣色左顧右盼尋根揣本則貴賤貧富吉凶壽夭灼然可見矣

雜說下篇

形體身骨相之根本也氣色相之枝葉也根本

固則枝葉繁根本枯則枝葉謝論相所以先究形體身骨而後氣色也夫氣舒則色暢氣怙則色靜氣通則光潤華明見於色此皆氣色之善也氣偏則色焦氣滯則色枯氣蔽則懔

悴暗黑見於色此皆氣色之凶也夫形如枯木心如死灰淡  
然不與世俱此又至人之相不可以氣而論也

已上三篇與玉管照神雜

說同

金書寶印上篇

形以清竒古怪者須得神與氣合若神氣

不爽則孤露

古

塵俗

怪

寒薄輕沈非貴相也得清如寒冰竒

如美玉古如蒼巖之老松怪如泰山之磐石雜之千萬人中  
見而異之者乃清竒古怪之貴相凡有此相必須操修過人  
功業隆重聲聞天下也形有五寬五短五慢五露五急五藏  
何謂五寬曰氣色曰行坐曰飲食曰言語曰喜怒全此五者  
必遠大何謂五短曰頭曰手曰足曰脛曰身全此五者中流  
之相也何謂五慢曰神曰性曰情曰氣曰行全此五者壽而

終於遲也何謂五露曰眉耳鼻齒眼全此五者清烈孤貴異顯之相也神露路死夭折何謂五急神氣性皮骨發早而易喪也何謂五藏視藏神言藏聲見藏色思藏息聽藏氣全此五者清貴遠大之相也前此六說中有可採宜更致思定有所得五惡殺兩眉短尖眼常如淚此爲卒暴殺鼻折準頭曲斜羊視此名自弔殺目睛黃動口不合唇此爲扛屍殺肉橫四起暴露不檢此名凶暴殺眼中赤筋眊反強視此名鬪亡殺苟有一焉皆不能善終常以此言爲當也

金書寶印下篇 山川麗秀而氣不同此人之生其形性所以有厚薄輕重清濁之異也故閩山清聳人俗於骨南水平而土薄人俗於情北土厚重人俗於鼻淮水泛濁人俗於重

若宋人俗於口蜀人俗於眼魯人俗於軒昂江東江西人俗於色如此類者皆風土致異故也論相而及此者幾於神乎唐舉論相不好言形而好論色不好言聲而好言氣余以爲深意也蓋形聲一定而不變所以易色氣屢變而不一所以難若唐公者是故欲精其難能也嘗得其所著論氣色之文夫人之氣色皆發於心榮於肺觸於肝散於腎暢於脾故氣色光而神靜血通飲食流暢喜之也氣色昏則心亂血滯飲食脹逆憂之也喜憂之候外見則浮如薄雲之濛日內見則隱如圭璧之有瑕或盈而慘舒或發露藏息長者如絲細者如毛圓如粟長如麥斜如倚竿皆氣色之現也極致力徹旦而視之憂喜足徵

面部一百二十位 人生也雖有善惡之形而貴賤未可分  
雖有吉凶之色而禍福莫可詳是以聖人以一面之形分百  
二十之部上應三才下配五嶽俯仰天地之位辨別內外之  
方見其形則知其貴賤察其色則驗其吉凶也其謂至蹟至  
深莫可得而隱也且天中者最中之位以象人主所以威制  
萬古故刑獄在旁兵衛在後公卿前列府庫左右精舍爲神  
露之府故動於眉睫之上學堂爲聰明之館故近於耳門之  
前目者受色福故妻兒俱列於目下財者爲人之貪故盜賊  
依於金匱山林近於仙路弓弩落於邊方承漿近口日角居  
天且上停者又爲天曰主祿中停者又爲人曰主壽下停者  
又爲地曰主富三部亦爲三主上停初主中停中主下停末



主故上停豐滿初年福祿中停隆厚中年成立下停缺陷者  
晚年破散大體吉凶貴賤無所不攝今畧舉此數端可皆以  
此求之 中央直下一十三位 天中主過事又主官祿高  
起直者初年得官平滿者宜遠行有官祿缺陷者主刑獄死  
天庭主三公貴品之部若有骨起者當爲卿監骨起而兩  
邊元角應之必任宰輔有黑痣缺陷主刑死一名天牢主貴  
人之牢亦名鴻臚寺亦名四方館骨陷色惡不宜此處任官  
司空主天官三公之部骨起光澤者當任三公九卿色惡  
不吉 中正主羣僚之事詳品人物之思亦主官位高下進  
退骨起色潤澤主官不歇滅 印堂主天印兩土亦名揚闕  
庭掌符璽之官方寸起而瑩者二千石守方寸平而靜者三

品任官不離闕庭方寸陷者亦主富貴眉接連不廣一生無  
祿當傍有黑痣癥痕事或不吉也 山根主有勢斷絕主多

厄無兄弟狹薄而低者並無勢力眉鼻上亦名玉衡又庭中  
平滿或有奇骨伏起者招國祖之喜但衡上依依山侵則名  
聞朝野若陷窪而目得相見者則情淺識露謀事難成 年  
上主己身之疾病骨肉起一生無疾患陷缺者主惡死有黑  
痣者主貧苦 壽上主命之長短事之吉凶陷缺者無壽又  
名怪部青色赤黑交錯怪兆也應林木爲怪應欄檻牛馬爲  
怪應井竈釜鳴井沸爲怪 準頭主富貴貧賤百事吉凶端  
正圓平直充滿者富貴有官準頭齊者心性慈準頭分妨尅  
兒左爲蘭臺右爲廷尉成就平好者聰明見識 人中主人

心性亦主子孫深直端廣者忠信有子孫中蹇而短者天命  
孤獨貧有黑痣女人當自嫁 正口主信文充實平正稜成  
者有信行薄弱缺陷者多詐妄有黑痣者主貴吉利 承漿  
主飲酒如有黑痣不宜飲酒醉而當死平滿者一飲五斗常  
朝酒食一名藥部主服藥色暗服藥不得力 地閣主地土  
屋宅平厚者多田宅而富狹薄者主貧苦頤頤主貧富圓厚  
平澤者必富尖陷者貧窮長者主尅害骨肉 天中橫列八  
位 天獄一名理獄主刑厄平滿者不犯刑獄缺陷及色惡  
者多遭獄厄 左廂主丞相平滿者吉利骨起與伏犀相連  
者當入宰輔陷缺坎壞者亦多災厄 內府主金玉財寶骨  
起平滿家累珠玉身復仁孝缺陷者淫蕩消折亦獄死 高

廣主方伯之座豐起者當任刺史平吉利有黑痣少喪父母  
陽尺主近佐之官肉骨豐起位佐郡之職缺陷者主官歇  
減有黑痣者客死他鄉 武庫主兵甲之吏骨肉起者宜任  
兵之官若有癰疽缺陷者不宜任此職亦從軍之敗有黑痣  
兵死赤色主鬪傷黃色不宜受寄尸兵 輔角主郡守之位  
骨起而色明者主任藩府一名弓弩有黑痣主兵死微黑主  
退官失祿赤色暴病或爭競官職輔骨大卽官大輔骨小卽  
官小如無骨不可求官 邊地者主邊郡之職亦主遠行吉  
凶肉起吉利邊地骨峻起者主護御之權黑色不能遠行陷  
者爲奴僕使有黑痣色惡者不問男女皆客亡 天庭橫列  
八位 日角主公侯之坐充滿洪直骨起者主御前常坐光

澤行人避道

天府一名王府主人朝召泰是故天府枯燥

有官而無道

房心主師侍之位骨起者爲人之師骨起而

黃色光澤者爲國師也惡者非時主病

上墓左右主父母

之位骨起者宜父母光澤子孫滿堂黑痣缺陷主溺死枯燥

者父母不能葬

四煞主手足妨之病四時煞害之事黃色

憂傷損黑色被賊引縮缺骨起居皆憂煞害平滿光澤者一

生不被害

戰堂主征戰事色斑惡者戰不還色好平滿戰

勝缺陷兵死骨起爲將

驛馬主乘騎之事色澤者如乘馬

去陷缺者無乘馬之祿色惡者乘馬有死

弔庭主喪亡之

事弔庭白如梨花父母死微白卽披服及黑痣喪服多時矣

司空橫列八位

額角主公卿之位缺陷一生無官骨起

爲公卿一名額中色紅黃者大吉黑色主死色惡主厄向人叩頭赤色發如豆主刀兵死 上卿主正卿之位亦主家鄉骨肉起而常光澤爲官必親御座色惡遠離家鄉 少府主府寺之位骨起者任府寺色惡有官主失職右府黃起貴人徵召不出季月應之 交友主朋友之位骨起及色紅黃者交友輔強缺陷者一生寡合色惡與朋友爭競色青外婦相愛色赤外婦求離色白妻有分離 道上主出行之位亦名衡上骨起一生常在道路平滿一生不出遊缺陷及色如馬肝主客死道傍 交額主福祿之位骨起肉起及色好者主有福德黑痣者吉色惡及缺陷者一生不崇福德 重眉主勇怯之位骨肉如重眉主有勇富貴缺及色惡皆主怯弱貧

賤 山林主野積之象山林廣厚必多藏蓄又多勢力淺薄  
無勢力不可委任大事一名崖色有黑痣入山林主被蟲傷  
亦名四季天子卽看兵馬疆壯四方人物美惡色黑四方有  
賊黃色四方安靜凡人色黑不宜遠行 中正橫列九位

龍角爲顯貴之位有骨肉端美從眉上積起涉額如龍角者  
主爲使相女人爲后妃若形盤薄狀如蚯蚓者心多妬忌也  
虎角將帥之位當主兵權一名疑路主行之象也色好宜  
行色惡慎出有黑痣者行不還 牛角主權貴之位骨起如  
角者使相之權 輔骨乃職制之位骨大者官職大骨小者  
官職小陷缺者終身無祿 元角主官祿之位骨起有角者  
食祿無角者不可求官 金戟主金吾之位骨肉起者有兵

革之權色好武選清顯陷者兵死 華蓋主邪正之事深厚  
主壽有官短促刑獄少壽淺薄殃邪一名厄門有惡色黑痣  
及平落主暴死一名皮部乾枯者主經商銷折 福堂主福  
祿之事豐厚者有官祿無災富壽狹薄者貧夭無官一生又  
遭非橫之災 郊外主出行之事若惡色不可遠行骨起者  
一生不可出遊有黑痣陷缺者他鄉死 印堂橫列八位  
家獄主刑厄之事平滿潤澤者一生不徒囚一名頻路若是  
常不潔者主多憂陷缺者獄死 蠶室主女工之事平滿光  
靜家內宜蠶陷缺無田蠶色惡妻妬不良 林平主仙道之  
位骨肉起及色常光澤者修道德或急或惡缺陷者服藥死  
精舍主僧道之位平滿色澤釋慧有成缺陷色惡者釋無



成 嬪門主宮嬪之位豐潤色好者妻婦吉慶缺陷者妻婦  
厄 劫門主劫盜之位骨起肉豐及色好者永不被盜有黑  
痣常被劫發惡色劫賊 青路主私路出入色瑩澤好者出  
入則吉色惡者不宜出入則有厄難 巷路主公路出入色  
淨平者出入則獲福祿色惡者出入則有凶惡也 山根橫  
列十位 太陽主口舌喜慶色惡主鬭訟有黑痣常憂爭競  
色好男得好婦女得好夫 中陽主家室之事青色夫妻欲  
離黑色主病赤色夫妻鬭競其色好得暴財之吉 少陽主  
災厄顯色有厄平淨少災青色起入口者憂色顯鞭筆之厄  
外陽主相謀之事黑色主被人枉謀青色被冤枉死 魚  
尾一名盜部主盜賊之事有黑色爲盜所害色好一生不被

盜陷缺是賊人也色惡被引也

奸門主奸私之事有黑痣

爲奸盜所害奸門有肉起姪穢不避親疎色惡坐受奸刑發

色好得美婦

天倉主食祿之位平滿圓成肉豐主食祿此

中不滿縱得官常得貧任一名軍門有黑痣陷缺者有軍中

之難也

天井主財帛之位平滿富盛有痣井厄

天門主

開闔詳占之事又名地戶發好色主吉慶之事發惡色主婦

人與爭訟

元中主修行之路在天門之後近耳也豐廣者

學道有成有黑痣不可出家主虛誕而無成

年上橫列十

位夫坐女左爲夫坐男右爲妻坐主夫妻吉凶之位光澤

端滿者男有好婦女有好夫有黑痣者男主妨妻女主妨夫

長男主長男之位定長男好惡黑痣主妨長男

中男主

中男之位定中男之吉凶非時發赤色如豆者不出一月共  
婦鬪競也 小男主小男之位定小男之好惡婦人有黑痣  
則主妨夫 外男主外子亦主孫息之位如有黑痣害父母  
一名外宅色平滿好者男得貴家之妻女得貴家之夫目下  
都名房中春若三月青黃色者有子之象男有黃色者生女  
女有黃色者生男白色子死赤色子厄皆以四時氣推之有  
黑痣憂子災目下端平光澤生男女尤多 金匱主金銀之  
位平滿光澤者主積金銀枯陷者主財乏有黑痣主有財被  
盜 盜賊主偷盜之位平滿者不被盜賊發惡色卽是賊  
內禁主內禁口舌之事平滿者一生不說人長短缺陷有黑  
痣常懷毀謗 遊軍主邊遠之職平澤色美者宜任邊遠之

官色惡不宜遠行 書上主學堂之位若不潔淨或有黑痣  
缺陷者主無學問 壽上橫列十位 甲匱一名財府主財  
帛之庫平滿光澤者一生足財若陷缺色翳者一生乏財帛  
往來主行人之位色澤紅黃者行人不出月內至枯燥者  
行人不來 堂上主六親之位色紅黃主親戚相聚之喜色  
白主喪父母兄弟 端正看人難易之位色枯燥缺陷者性  
難色澤端正者主性易也 姑姨主姑姨之位左看姑右看  
姨骨起肉色好者姑姨美好枯燥則姑姨多病缺陷者無姑  
姨 權勢主權勢之位端圓豐澤者有權勢隳毀者無權勢  
兄弟主兄弟多少之位右爲姊妹之位左偏高妨兄姊右  
偏高妨弟妹端闊光澤者兄弟強衆兩頰如雞子單身一世

外孫主外孫之位看平滿光澤色定外孫多吉少凶 命  
門主壽命長短骨起入耳必百歲不死有黑痣火燒赤痣兵  
死色惡常疾病患 學堂主學識之位骨隆端色淨潔者文  
學聰明骨陷色枯黑痣癰疽者無學問也 準頭橫列八位

號令主號令之位端淨分明者主施設號令衆數咸伏若  
無出令令人慢之一名壽部長而美重而分主壽高遠 上  
竈主宅舍之位平滿主好宅舍陷缺無屋可住 宮室主人  
房室之位天子曰掖庭色惡及缺陷者主妻婦病厄天子則  
主嬪妃疾厄 典御主僕使之位看奴婢多少平滿一生不  
乏奴婢陷缺枯燥一生無奴婢 困倉主食祿之位平滿主  
有祿食缺陷饑餓死發青色者主憂官災 後閣主寄居之

位骨肉豐起一生不寄住缺陷定他鄉之館也 中門主富  
祿之位平滿無黑痣者主家道富缺陷一生無祿而貧 兵  
人主兵使之位平滿者有兵驅使缺陷急惡無兵使用也  
人中橫列八位 井部主田宅之位平滿者宜田宅缺陷者  
一生無宅居止有黑子溺死 帳子主廚帳之位豐潤主有  
廚帳窄狹主乏廚帳 細廚主飲食之位平滿者足陷缺乏  
饕發惡色爲食死白色咽酒食致死黑痣餓死黃色暴死  
內閣主闡閣之位豐滿者闡之深遠色惡闡閣淺穢缺陷亦  
然 小吏主看多少有無 奴堂主妓樂多少女妾有無之  
數 媵妾主妾媵多少平滿家足妓妾之樂 嬰門主醫學  
之位若缺陷蒙醫亦不喜服藥 正口橫列八位 元壁主

珍寶之位高峻色美家蓄金玉色惡缺陷金玉散失矣 門  
閨主閨闈之事亦主閨閣深淺色惡者閨闈有變 比鄰主  
鄰宅之位平滿色好者良缺陷色惡者有黑痣多鄰有惡人  
委巷主里巷之位如惡色發出入被刦骨肉起者無賊害  
客舍主賓客之位平滿端好者好賓客缺陷者不喜見人  
兵蘭主走使之位陷缺者家無走使 家食主穀食之位  
平滿色美足糧食缺陷色惡虛名商旅主興販好惡 山頭  
主路之位平滿者出入無險難缺陷者多災也 承漿橫列  
六位 祖舍主父母田宅平滿光澤者足祖業陷缺者無田  
宅有黑痣主棄祖移居 外院主牛馬莊田平滿足莊田牛  
馬缺陷者無色惡者牛馬損矣 下墓主墓田之位平滿色

潤主有墓缺陷色枯者積代不葬 野土主雞犬猪羊多少  
子孫進益之類 荒邱主外國之類平滿光澤者宜外國遊  
行天子巷此中平滿主外國來朝 欽庫主車行之位方滿  
主宜乘車缺陷乘車騎有厄 地角橫列七位 下舍主外  
宅多少平滿多外宅缺陷有黑痣者貧而無外宅也 奴婢  
主奴婢之位平滿者多奴婢缺陷黑痣一生奴婢乏使 碓  
磨主碓磴磨坊之位 坑塹主厄難之位有痣者主墮坑險  
死 陂塘主池塘之數平滿者足陂澤缺陷者無田湖有黑  
痣主涉江湖而死發惡色者曼口舌 鵝鴨主蓄禽養之利  
看多少之數 大海主水死之位赤色溺死黑色失屍黃色  
宜涉江湖矣





四瀆 地之四瀆者所以相朝以接其流通人之形貌亦有像焉且鼻爲濟目爲淮耳爲江口爲河故四瀆欲得端直清大明淨流暢涯岸成就者則應於神故貴而多智也若夫醜而不端則爲愚人毀而陷者則爲賤類也

人倫風鑑同

五官 五官者目爲鑑察官鼻爲審辨官口爲出納官耳爲採聽官眉爲保壽官五者欲得清而秀豐而隆或一官好則貴十年或有缺陷者及醜惡者凶

六府 兩目上爲二府兩輔頰爲四府兩顴骨爲六府六府者欲得平滿光而瑩若一府好乃富十年或有缺陷疵癥黑痣者凶也

五行所生 木爲仁主英華茂秀定貴賤也火爲禮主勢威



五行相尅歌 耳大唇薄水尅火衣食貧寒空有智唇大耳薄亦如然此相之人終不貴鼻大眼小金尅木一世貧寒受孤獨眼大鼻小難爲成雖有資財壽命促舌小耳大水尅火急性孤獨區人我耳小舌大亦不仁慳貪心惡多災禍舌大鼻小火尅金錢財方盛禍來侵鼻大舌小招貧苦壽長無子送郊林眼大唇小木尅土相此之人終不富唇大眼小貴難求到老貧寒死無墓

五行比和相應 耳反須貼肉鼻仰山根足眼露黑睛多唇反齒如玉臉近於眼口必主公卿福只恐壽不延性氣剛難伏

四學堂位 一曰眼爲官學堂欲得長而秀清黑白分明主

有官職二曰當門兩齒爲內學堂欲得白而平正密而瑩大者主有忠信德行三曰額爲祿學堂欲得方而廣瑩而峻主爵祿富貴四曰耳門之前爲外學堂欲得平滿光瑩主聰明學識也

三輔學堂 上輔學堂者身自天中至印左右橫列十位謂之二分部光潤全起成就平如徑寸主大貴出將入相官至二品更若中輔全者位極人臣一品之職上輔有一部缺陷仍以中下輔參之此而不成就止主參領權務出入主命官至二品或中下全陷無部應得主給承郎武侯更東西嶽起地角高額相應之時節戟方面或中輔更一分應之必爲真宰之位當榮極旺二十年早遂中限當秉生殺若下輔二分

應者亦無缺陷當主大權然下輔主繁冗之職卽不能久居相府當鎮方郡必建旌旗若下二分與上輔全備卽使相矣若上合一分中輔一分全者亦主內制清要之位或只相部合一分五釐餘別無應形足氣清必給諫御史之職更中輔五釐應之必殊常緊要之位才名挺動四方中輔二分全者應爲成就主卿監使相兵將之權或東西嶽起地角朝厚武官主侯伯之封中上三分全好者大權一爲皆小通無滯一爲旺二十年所謂蘭膏成就學堂寬博真貴人也若學堂或圓或方五分俱起統攝萬邦助國王侯伯之相以上若一位枯乾惡色亂紋痕皆爲缺陷雖郡城職位多滯連邇也中輔學堂者自山根下至準上兩眼正口并額骨六位謂之一

分位若位豐隆或若紅紫色光澤無斷紋痕翳黥黑痣主都  
察臺閣清資不然兵刑之位一生少滯無災有聲名更下輔  
一家全應必爲四品陰深卿監一作正郎之職若下輔二分全與  
中輔俱好卽三公尚書侍郎不入兩府有威權重名動朝野  
武臣則建節方外將帥之權其下輔成其中輔有五釐不成  
就亦主卿監四品官若中輔全就而龍虎外起並主三品之  
位如形神端靜部位相稱骨氣清秀頭角深長高入髮際主  
給諫清要之職其氣昏濁部位不明疵癍黑痣是謂缺陷有  
破乃一生少權無聲多滯官職歇滅凡相人宜細詳消息則  
不失矣 下輔學堂者自元璧下至頤額四位謂之二分位  
二位豐滿明澤光潤而全成就者主卿監正郎兵將藩府繁

劇要務之任如武臣則防團刺史守邊之職如二分俱備只左右破陷四釐者可取準頭應之亦主有五品三品職官武則諸司使副之位然須多滯晚年方達者下輔每分卽有五釐兩處共成一分者京官幕職而已若中輔兼得二釐光潤平滿亦可位至員郎或卽上輔兩三部中相應合成一分七釐者主正郎聲望清顯其上中下三輔合得八釐者文主令祿幕府之官武當借職班行之位若三兩處每處二三釐合成一分者雖無官職亦主衣食自足若上部一分學堂員郎之位二分學堂兩眉分制或中下學堂應之則將相資財職上部學堂二分共三分者不入兩府主兵將之權共得四分者出將入相五分全就者總攝四方貴不可言也上左右十



位一分中六位一分下四位一分都計五分此也

太清神鑑卷二



太清神鑑卷三

心術論 形不勝貌心不昧術久昧者不明也爲物所役故  
屈于用心爲事所奪故謬於擇術卒至凶咎悔吝之及也然  
後怨天尤人比比皆是每一念想未嘗不爲太息然臨事制  
物正心術而可取者有七乖心術而不可取者亦有七所可  
取者何一曰忠孝二曰平等三曰寬容四曰純粹五曰施惠  
六曰有常七曰剛直其不可取者一曰陰惡二曰邪穢三曰  
苛察四曰矜誇五曰奔競六曰諂諛七曰苟且此皆出心術  
之不同而感于異也此古人有論心擇術之戒也或曰心術  
之不可取與所可取者各有此於形可得乎曰貌端氣和者  
忠孝骨正色靜者平等眉開眼大者寬容氣和閒暇者純粹

面開準黃者施惠鼻直神定者有常形肅貌古者剛直有是  
七者在所取也眼凶神露者險惡眼下嫩色者邪穢眼深肉  
橫者苛察眼有忿氣者矜誇眼急色雜者奔競視流容笑者  
諂諛氣麤身搖者苟且有此七者爲心術在所不取也如眼  
下肉生龍宮福堂黃氣盤繞是有陰德之人也夫德物無心  
臨事無物體道而出體道而入世間種種一無干吾之靈臺  
果何心術之有哉所謂心術者乃以勉人之不及而已懼而  
行之亦可以同歸乎善而受道也

玉管照神  
七可取同

論德 德之爲義大矣哉天之有大德也四時行而長處高  
地之有至德也萬物生而長處厚人之有德也亦若是矣是  
故人道祐之人心歸之享長生之榮且能孝于親能忠於君

能和於人能齊於物爲德之先爲行之表雖未陽賞必獲陰報未及其身必及子息是以善相者先察其德後相其形故德美而形惡無妨爲君子形善而行凶不害爲小人荀子曰相形不如相心論心不如論德此勸人爲善也又言其德爲先矣夫形者譬之匠也材旣美矣匠拙則棄之乃爲不材之木也人之形美矣苟無德則形以虛美而天禍人損遭之凌辱無疑也是知德在形先形居德後乍可有德而形惡不可形善而無德矣

死生論 古之至人以生爲勞佚以死爲休息是以知來去非我而可以生可以死也將獨立乎萬物之上斡旋乾坤于太虛之中果何得死生而相邪此鄭之神巫見帶人子始以

其子不可復治終則未死而老也徒下愚而不知道汨沒世事認己爲有認物爲我以生爲可悅以死爲可惡內焉所藏于心思慮縈縈妄意一生面目乃變使人得以相之故神昏者死神亂者死神浮者死神雜者死以此言談動止俱失當不過數旬而死矣須臾看淺深而斷然不可拘也嗚呼死生亦大矣世之迷者改頭換面沈溺苦海不知究也胡不斷所寂滅觀相識本來面目一證人事如曰不然未免流轉死生之途而受苦惱也

論神 神之爲道出而不可見隱而不可求故虛而無形也則是索之于心隱而無象也則可測之于形昭昭然見於眉目之上幽幽然運於五臟之裏故人云晤盡則神遊於眼六

德則神思于心是神出處于形而爲之表猶日月之光外照萬物而其神隱于日月之內也且夫人之眼明則神清昏則神濁清則六德多六昧少濁則六昧多六德少夫夢之境界蓋神遊於心而所遊遠亦出五臟六腑之間與夫耳目視聽之內也其所遊之象與所見之事或因想而成或遇事而至亦吾一身所自有也故夢中所見之事乃在吾一身之中非出吾一身之外矣故白眼禪師說夢有五境一曰虛境二曰實境三曰過去境四曰現在境五曰未來境是神躁則境生神靜則境滅則知是境也由人動靜而生者也夫望其形或灑然而清或翹然而秀或皎然而明或凝然而瑩眉目聳動精彩射人皆由神發于內而見于表也其神清而和明而徹

者富貴之象也昏而濁柔而怯者貧薄之相也實而靜者其神和玉管云詳而靜者其神安虛而急者其神躁故于君子善養其性者無暴其氣其氣不暴則形安形安而神不全者未之有也又云氣者陰陽之移人無寒暑之故不其難乎髣髴之間變則有氣神則同乎氣而有所主也及乎氣變而有形神止乎形而有寓也變而有生神則未嘗生變而有死神則未嘗死古之得道者不染塵埃不役于事爲知神之妙與太虛同體知神之微與造化同用則爲聖人至人神人爲用如此是形在人世間者神則藏於心發現于眉目之間猶未失其本真則以古爲上清次之媚又次之如流散昏濁是其從謬至迷一至如此不足論也聳然不動視之有威



謂之古澄然瑩澈視之可愛謂之清怡然灑落視之難捨謂之媚各得其體格神氣而賦之未有不爲公卿達而上則神仙矣媚雖有貴乃阿諛諂佞之人雖在朝廷身之進退亦何足數似明不明似峻不峻謂之流散似醉不醉似困不困謂之昏濁嗚呼人之喪精失靈不知神之所謂以至爲萬物同出入于機不知覺也

論神有餘 神之有餘者眼色清瑩顧盼不斜眉秀而長精彩聳動容貌澄澈舉止汪洋灑然遠視若秋月之照霜天巍然近矚似和風之動春蘂臨事剛毅如猛獸而步深山處衆超逸似丹鳳而翔雲路其坐也若介石不動其臥也如棲鳥不搖其形也洋洋然如平水之流昂昂然如孤峯之聳言不

妄發性不妄躁喜怒不動其心榮辱不易其操萬態紛錯于前而心恒一斯皆謂神有餘也神餘者皆爲上貴之相凶災難入天祿永保其終矣

論神不足 神之不足者不醉似醉常如病酒不愁似愁常如憂戚不睡似睡如睡纔覺不笑似笑忽如驚忻不嗔似嗔不喜似喜不驚似驚不癡似癡不畏似畏容止昏濁似染顛癎神色慘愴常如有失恍惚倉皇常如恐懼言語澀縮似羞隱藏體貌低摧如遭凌辱色初鮮而後暗語先快而後訥此皆謂神不足也神不足者多招牢獄枉厄有官亦主失位矣

論氣 論一人之至好御二氣以成德交通而和也則萬物遂其性命乖戾不調也則萬物失其理此乃天地之氣見乎

變化也石蘊玉而山輝淵藏珠而川媚由夫至精之寶見乎山川也萬物之情美莫不發乎氣而見乎色矣夫形者質也氣者用也氣所以充乎質質所以運乎氣是以由氣以保形由形以安氣故質宏則氣寬神安則氣靜得失不足以動其氣喜怒不足以亂其神則於德爲有容於量爲有度是謂厚重之福之相也形如材有松柏荆棘之異氣有規矩準繩之工隨材而成器隨形而制體故君子以形爲善惡之地以氣爲騏驥之馬善御之而得其道也是以善人之氣不急不暴不亂不躁寬能容物若大海之洋洋和能接物類春風之習習剛而能制萬態不足以動其操清而能滌千塵不足以汙其色小人反是則不寬而隘不和而戾不剛而懦不清而濁

不正而偏不舒而急但視其氣之淺深察其色之躁靜則君子小人可辨矣氣長而舒和寬裕而不暴者爲福壽之人急促而不勻暴然見乎色者爲薄淺之相也且氣之爲道又發乎顏表而爲吉凶之兆也其散如毛髮其聚如黍米望之有形按之無迹出人一面之部位又應人之禍福若氣呼吸無聲耳不自聞或臥而不喘者謂之龜息壽相也其或呼吸氣盈而動者乃爲天死之人孟子不顧萬鍾之祿以善養其氣者也爭升合之利而悻悻然戾其色暴其氣者何足道哉氣之所以養形在五臟六腑之間因七情而斂散故發于五嶽四瀆之上有六氣之變能清濁以無餘湛然寂如固山水之淵井六氣可得而取也青龍之氣如祥雲觀月朱雀之氣

如朝霞映水勾陳之氣如黑風吹雲騰蛇之氣如草木將灰  
白虎之氣如凝脂塗油元武之氣如膩煙和霧六氣之中惟  
青龍爲吉其他或主破散或主憂驚或主哭泣或主陰賊如  
骨形不入格終身爲所累如骨形正當候得數然後氣散名  
顯也亦看所賦之深淺而消息之人有異相不貴由爲雜氣  
所繞如遠山奇峯秀嶂小爲雲霧所蔽不可得而見也一遇  
匝地清風當天皎月奇峯秀嶂非特可覽于目前必使留戀  
難捨也

大畜秘神氣歌

天中青色見年內染微疴直下來年上定

主見閻羅只到天宇上入獄亦由他並準青光起憂驚病至  
多青中更有黑必損自家錢散下雙衆獄官事欲相牽印堂

黃氣起官祿定高遷白氣家遭喪青來口舌纏中正發黃絲  
守令職無疑赤點中心出公事別妻兒青光驚必恐黑色怪  
神窺白色憂喪事迤遭事日隨白絲攔鼻上繞口當年哀黑  
生一日內財被賊來欺黑氣橫長起夫妻欲散離白光橫過  
鼻子息更妨之訟獄黃氣起在禁脫枷災青絲下眉首入獄  
共咨嗟黑氣如斯至獄死更無救赤又浮青色離獄亦有咎  
黃氣生高廣如鼓掛懸空百日爲明牧無中定貴封黃色來  
四季應好事干通色又房心應官高職轉雄若占天中位榮  
華與廣同雙人促一鼓必定拜三公入準天中應侯王列土  
封印堂黃似月魁第扼朝中日角黃絲發兄弟有權怡白光  
來庫墓刀兵自失期入匱愛財物元坐鬪訟疑喧爭觀上下

朱光口舌非廚中發黃色喜在六旬餘或因州府事得職又  
非處房心生日花飛道入山家不來日下住抱疾主顛邪天  
庭發黃色白屋出公卿青白如還起高官被罷停白黃居此  
位妻兒人折迎若遇他人婦必定共交情鄉路黃絲發公卿  
白日封赤氣離鄉走黑光死路中白色來就額不出五旬間  
走喪終是有防避定應難眉頭黃色起喜事自相迎若見紅  
光起吉慶更加榮白氣圓眉轉因之或受驚直下君須看入  
獄見災迤若下來年上徒流仔細防中陽黃氣起至年定封  
侯赤氣來奸坐婦人外遭偷尺陽黃潤澤妻妾豈常人目下  
黃來耳官職自榮身眉頭生赤氣準上又相迎多應一年內  
無辜入杳冥白光遊日下哭泣卽時聞旋繞眉間轉家因犯

鬼神黑光迎目下子息病相侵若方圓一寸罪至決歸刑顧  
上黃色新參迎見貴人白光停巷路定作遠行身黃白入奸  
門飛來入精舍婦人自此奸不論春與夏直上準頭齊陰相  
得盜藉走去右顧停妹妹外人話入至衆人部定作郎君婦  
黃光逕兩耳年中封壽位直下似人形女人得貴婿赤色在  
邊庭渾家被大驚若上山林際尖炎滅天形青光在耳畔蛇  
蝎惡侵君白絲來兩眼當爲病死入赤光生甲匱入至命堂  
中只因財產上訟事見災凶赤色入欄檻牛馬不能行青光  
被觸損黑氣至無生奴婢黑氣起僕走休咨嗟若有元光發  
身當死女家陂池發青色田水有凶災白光防并溺黑氣隊  
江哀部位并生尅五行意審裁一虛含萬物消息屬天才



紫堂靈應補氣歌

赤氣天中年上停若纏眉際定歸冥只

在天中獨橫立斯人清晝被刀兵赤下目來紅潤澤因功得  
爵定分明亦若眉頭分目下男私外婦女他情天中白氣來  
邊地年內逢災急須避直下印堂官事起夫婦生心要離異  
黑臨地部愁親病婦人產難終須定若爲準上入奸門無故  
因他婦害命只來坐上自當身定是文書來喜慶黑色天中  
欲得平下來雙獄受繩刑若到年上身遭病直來入口死於  
刑氣似鳥虛至顴勢忽到兩眉憂卒死若如小帶橫眉上壽  
絕人間並無子圓光黃色天中見士人必拜公侯面凡度之  
流皆主權氣色四時看改變狀如鐘鼓下天獄公卿自至榮  
高祿若似蛇狀位星郎庶人得之進金玉中庭懸鼓三公相

蠶絲之氣得官祿色若黃澤一世終此身必無陷獄刑印堂  
黃色方寸明八旬之內入朝廷赤色來之主失職上來忠事  
堪經營鼻梁火色憂官擾青來年上病相縈白氣當年遭哭  
泣黑氣入口死分明司空黃色應時開五旬之內橫財來上  
至印堂封爵祿如日初升位輔台準頭赤色似生麻八旬之  
內有誼譁若在公門逢此氣定遭笞撻辱其身白氣至頤年  
內死又知魂魄有虛驚黑色兩邊憂父母青光黑白喪家親  
人中黃色甚奇哉不及眉間喜異常若更通行兩頰上必定  
高榮作正郎可憐藥部生元色見病之時不用醫天府黃陰  
光潤澤三旬之內得天財狀如細柳抽纖葉身入朝堂列鳳  
臺若如紫色紅光潤不出旬中喜語來闕廷黃色上天中大

拜公侯在季中若至司中微進退四方相接入皇宮武庫紫黃如懸鼓將畢印綬位非虛若立若飛來入相不宜受物寄閒居兵闌武庫卽同看赤光白日被刀攢白色外來驚險難黃光出將見加官黑氣遭兵須陷死青光上送無多端語息四時生改變此篇靈應須詳觀

氣色法訣 凡看人氣色須天色方曉傍起時就幃幄中以紙燭照看辨認方驗吉凶無失共就簷光處面背非本分氣色者也輒不得洗面盥漱飲湯藥然後看之亦難驗矣且五臟初氣色卽早朝面養息于心故侵晨觀之則見五臟五色清氣朝于面也其凶惡氣色無時朝發於面或觸事憤怒而發或感物憂喜而成或飲酒而色赤青或營幹而亂理色活

漫皆非本臟之色一時亟發而成故吉凶難辨也其有不于早晚看者第令凝神靜坐良久看之庶幾有徵焉若夫不拘早晚酒後醉中怒間汗後更不待停而看者此則又有一時浮暴之氣發見其先見之吉凶難可得也

氣色形狀 青色如瓜黃色如蠟赤色如火白色如脂黑色如漆此五者色之正發之甚者也五臟所生一曰水水之于物爲精其臟在腎其神元冥發色爲黑其旺在冬精具矣則神從之也二曰火火之于物爲氣其臟在心其神丹元發色爲赤其旺在夏神至矣則魂從之矣三曰木木之于物爲魂魂者陽物也其臟在肝其神龍煙發色爲青其旺在春魂在矣則魄配之也四曰金金之于物爲魄魄者陰物也其臟在

肺其神皓華發色爲白其旺在秋精神魂魄備其意在焉故  
五曰土土之于物爲意意者精氣也其臟在脾其神常黃發  
色爲黃其旺四季也是故皆朝于一面而息于五臟也五色  
所生定憂辱青色主憂事若色厚者主憂重色輕者主憂微  
色散者主憂鮮色盛者主憂緊色白主哭事若色厚者主大  
喪色浮者主輕喪色散者主外服也色顯者主喪近也赤氣  
主擾若色盛者主刑獄色濃者主刑死色黯者主病重色散  
者主病瘥也黃色主喜慶若色盛者主大慶色薄者主小喜  
色散者主喜退急者主喜近也

六神氣色

兩眼黑白分明神元紅黃精彩射人者謂之青

龍之色主遷轉官職招進財帛喜慶之事面色赤如撒丹擾

如煙昏者病躁者謂之朱雀之色主有官災口舌驚擾之事  
面上拂拂如灰土色精神昏濁者謂之騰蛇之色主驚憂怪  
夢不祥家宅不安之事眼色湛濁黑白不分神光昏翳眼下  
青鋪者謂之勾陳之色主牽連負累遮滯之事兩眼白氣閃  
閃似淚不淚瑩白光者謂之白虎之色主喪凶亡服外孝之  
事唇黑而顫口傍左右黑氣拂拂者謂之元武之色主陰私  
小人相害失脫損盜之事

元靈寶文 夫氣之色發天府如豆大貫鬢邊有黃色應者  
主得藩郡之任黃色光在印堂當中有一紫色如豆者一年  
內主大拜黃色在天部貫金匱及連至精舍道衡又華蓋上  
盤旋縈繞者主得兵權及轉職賞財兼產主得貴子紫色如

小蠶許主將加官或自封拜其次領鎮如顴骨上兩道黃色  
橫者主出外必當喜事旬日至如青色從耳門前出下臨大  
海者受少驚恐若黑來主有聞憂內應黃在兩法令上及連  
至準頭者橫財四十日內應更壽上有應者得財萬貫已上  
青在山根通過兩眼頭者主陰私公事紫色從兩天中天府  
直下者又如蠶絲三五月半年外作丞郎青色從天庭上如  
韭葉大垂二寸者主外服期至十日至紅色如梧桐子許在  
地部上主百日內在南方領郡天中黃色直下來中正者八  
十日內恩賜詔書至少赤色眉上垂下者主勘事青色或在  
目上赤色垂貫眼及顴上赤者四十日內憂危刑法印堂有  
黑赤極分明命門青者一月內中風六十日內死潤澤赤者

卽不死赤色從耳門出似馬肝色此是將染腹疾之厄赤色如筋在準上下至人中二十日內被人損外口舌公事至赤色從年上分貫兩顴者八十日內有大殺公事及身不至死地部上起赤色者喫酒濁病赤色貫兩令上者憂公事四十日至赤色從鼻尾中下入家舍者奴婢中有陰私口舌事成赤色如毛從耳邊出至及蘭臺上應者一月內主馬失墜厄眼頭上下有黃色下垂者左是男喜右是女喜及妻有喜赤色從眉頭連幙頰額邊出者主虧官物被勘責事二十日內至如黃色似蠶絲錢許者貫左右兩眉上更印中應時八十日內主朝判府推也色黃如印足起貫邊地者二十日遭公事失位遠行之憂若黃色應卽解之赤色從太陽上起入邊



地起者被損失眼臉色如筋許從外入者被人謀已從內出者擬有相訴之說謹慎眼上下臉俱赤者主家有重病人若印部有左右赤色憂父母厄年上微赤主患脾之病老不至安壽上及準頭者亦憂重病若色從金匱起貫連壽上甲匱不到懸壁主得財其喜兼得水土官一年內至東起貫大海內當年主水災地部紫色圓黃色主貴顯赤色如撒者二七日內主爭訟事或如麻筋在兩法令上入獄厄微赤刑獄并兩肝來鬢上至爭競之事黃色如筋斜兩位者主東南上勾當公事得財或丁部南上奉使得財物若更臨金匱如車輪者得財萬數

色論 天之蒼蒼其正色邪雲霧乃其氣耳人之賦形受命

于天地相爲流通是所稟之氣有變動而色有定體也定體之色不止于蒼蒼其屬有五行之異金色白木色青水色黑火色赤土色黃得正色爲五行不相尅者不滯爲貴雜色蔽之卽差然色之正不可無氣現日月角溫粹可愛爲貴如枯燥昏暗不獨難發亦平生多主脾胃心腹之疾水火獄訟之厄或因骨肉法部局可取縱發則災立至古人有蠶吐絲之說自頷而開其吐絲也通體明快人之將發自準頭而開其頓發見無翳然後發入諸部位則見所任之職所居之位如發入處有瑕翳則職分不免有凶或無瑕翳則全吉矣更在知五色所生非吉凶之屬論色無出此者有神色未透天庭亦發者是其準頭開而得部位貴皆以相應不必至天庭也

或有陰晴未定不必至準頭也所謂貴處印堂帝座內府驛  
馬龍虎日月地角是也無貴而頓覺是謂不祥此說非言可  
盡修養之功消息之至可見矣若夫觀之寂然難取難捨有  
道者之色觀之瑩然不雜不亂得意者之色如嬌如滿自得  
者之色視之慘然陰合陽散細人之色視之茫然如得如失  
有憂之色其頓發皆準頭也觀妙經色論同五形之人得其本色或  
得相生之色者善五色得地者春色要青夏色要紅秋色要  
白冬色要黑又盡善也餘與瑋琳洞中秘密經同四季旺相休囚春三月  
青色旺赤色相白色囚黑色死夏三月赤色旺青色相黑色  
囚白色死秋三月白色旺赤色相青色囚黑色死冬三月黑  
色旺白色相赤色囚青色死

四季氣色形狀

春欲起夏欲橫秋欲下冬欲藏失其時者

皆不利也亦猶四時物理且春欲起者春有出生之象夏欲橫者夏有長養之象秋欲下者秋有收斂之象冬欲藏者冬有閉塞之象其有或方或圓形象萬端者亦在別術斷之

青色出沒

青色初起如銅青將盛之時如草木初生欲去

之時如碧雲之色霏霏然浮散五行屬木旺在春相於夏囚於秋死於冬發則主憂枯主外憂潤主大憂混主遠憂散主憂解應在亥卯未日及月以色深淺斷之

青色吉凶歌

天中光澤得詔貴枯躁須憂詔責亡秋色發

從年上去陰私口舌厄難當陽尺憂行兼疾病天庭主客繫堪憂交友婦須通外客司空或起被徒囚巷路但成百里威

太陽定與妻相打外傷枉死被纔言若是太陰連入日必遭

縣宰惡咎鞭房小春發當生子壽上當憂口舌牽坑塹對須

看大怪陂池

壽上應以上同

蛇怪不堪言山林花鳥妖呈異欄檻馬

牛有怪愆忽在井竈金鳴響不然井溢湧寒泉命門甲匱憂

凶厄準頭兄弟父母喪散失主邊防失職人中愁有別離傷

承漿不日當遭病大海須防水溺亡若臨月角須憂賊若有

川文官祿全日角臨蠶如傅粉印堂退口病遲延道上或逢

憂阻滯山林蛇虎厄難當若來金匱并牆壁財物三旬共可

傷姦門怕被外妻撓眼下橫來病苦纏壽上若逢憂病厄更

憂債負禍來煎口畔入來憂餓死更兼枉濫事相牽三位囚

傷子孫損半日之間入墓眠天門三十日財至天井圓珠武

官位病人值此病難安囚人見之尤連滯

黃色出沒 黃色初起如蠶吐絲將盛之時如璽之未繅或

如馬尾欲去之時如柳色之花搏聚斑駁然五行屬土旺在

四季相于春休于夏囚于秋死于冬又爲胎養之發則皆主

吉慶但不宜入口卽病瘟疫日則在酉申寅年戌日應之旬

則在子午戌辰旬應之萬無一差須以深淺斷遠近爲定耳

黃色吉凶歌 黃色天中列土分圓光重大拜公卿更過年

上井竈部有功常受賜高勲或如月出照年上天中定當宿

衛入朝門若經兩闕天中卽徵拜金匱天中詔賜帛與銀忽

至闕廷天中官驟轉不然卽是得財盈或是龍形須受賞如

懸鐘鼓主槐庭若似蠶絲官必得春來年上喜忻忻武庫光

潤將軍福亦主喜慶陽尺并母墓喜并田宅事更宜父母少

災連司空百日得財寶右府裏內勅來徵重眉交友如基子

七箇旬中左右丞更過

重眉過

山林天中者徵爲博士最爲榮

印堂如月六旬內拜作將軍鎮百城便似連刀天庭至

上至天庭

下及準頭亦分明斷他縣令忽遷轉長吏分官直闕庭火體

發時多喜慶亦言遠信至逡巡山根聽向皆稱遂太陽必定

得財慶少陽喜慶重重過魚尾有吉引前行若似龍形年上

見連色天中拜上卿眉眼之下有子象左黃生男右生女婦

人有以反前論金匱家內財帛人壽上柳葉主財入歸來遠

信至中庭出自準頭庭衝位

天中大庭

驟貴封侯起有乘蘭臺必

得尚書綬內廚酒食倍逢恩大海惟宜涉江者日月三公位

顯清甲匱生來財主庫內倉中似有蛇形道尚三位財如拾  
中角牛馬喜方成眉位有園多好事酒樽酒饌得豐醇

赤色出沒

赤色初起如火始燃將盛之時炎炎如絳繒欲

去之時如連珠累累然而去於五行屬火旺在夏相於春囚  
於秋死於冬發主公私鬪訟口舌驚擾之事潤主刑厄細薄

主口舌鞭笞應寅午戌并巳未口旬中則辰戌以色定之

赤色告凶歌 天中連印鼻頭赤中旬車馬驚令死下來年

上爭競災左右遠行須病住陽尺驚恐厄鬪生武庫友婦折  
傷災天庭必有憂囚事若見司空鬪罵來交友朋求離別去  
在職當憂上位刑無職定同交友鬪額角如值死于兵印堂  
爭鬪被憂囚若在山根驚怕憂太陽夫妻求離別年上暴厄



亦堪愁又却斷他生貴子房中妻不產賢侯三男三女病災  
迺壽上如豆與妻爭年上準頭連發此夫妻爭鬪太難明命  
門甲匱須兵死準頭官府事牽縈牆壁之上財必失外圓當  
紫得官榮武官巡捕看魚尾盜賊收擒倍稱情牛角看來牛  
馬厄山林蛇虎又堪驚忽眼下如蠶絲發妻子因何爭鬪聲  
金匱奸門招撓事承漿爲酒起喧爭陂池井部相連接因水  
逢財却稱情田上見之田地退口邊橫入禍全生酒樽酒肉  
宜相會地閣田岸有訟成若在山林須慎火又兼家內損財  
并命門發到山根止更過眉上左耳平只定六旬遭法死婦  
人右耳疾來頻

白色出沒

白色初起如白塵拂拂將盛之時如膩粉散點

或如白紙欲去之時如灰垢之散五行屬金旺在秋相于夏  
囚于春死于冬發主哭泣憂撓潤主哀泣細憂重浮憂輕散  
病瘥應在巳酉丑口旬在子戌旬中應之及秋月

白色吉凶歌

天中春色來年上鬪戰刀兵事可愁左廂必

定主憂惱陽尺將行走外州發在奸門因婦女皮乾入獄內  
遭囚又主男女相妬害交友婦須被外求山根見者主憂囚  
男女逢他必死憂壽上徒囚君不見堂上父母死堪愁命門  
甲匱凶來急內廚酒肉致傷亡承漿逢見身當喪大海遭時  
主水殃印堂白氣哭爺娘若在命門兄弟當姦門若招主私  
慟中嶽橫紋家有喪日月角中憂重服法令陂池脚足傷眼  
下橫紋夫婦鬪準頭還是競田莊地閣橫遮牛馬損若侵年

壽死公婆入口分明憂口舌困倉上有賊還多

黑色出沒 黑色初起如烏鳥尾將盛之時如黑髮得膏欲去之時如落垢昧五行屬水旺于冬相于秋囚于夏死于春發主病災厄潤主死亦兵亡枯翳客死散主病痊日應在申子辰日旬應在甲寅旬及冬月以旺爲應

黑色吉凶歌

天中必定失官勲忽于顙上似官刑若還至

下來年上病患相纏喪此身天獄年上應獄死高廣逢時病主亡陽尺過來凶可得天庭客死在他鄉四煞賊來成凶賊司空病疾苦纏身右府生來憂此位重眉不利遠行征額角黑廣善爲偷印堂移徙看他州山根必死于旬日太陽疾病厄堪憂牢獄至眼憂牢獄法令入口形分八更有眉頭青色

應百日飲酒還醉殺眼目更兼赤色間二旬或訟見血光外  
陽發被人欺劫年上憂死困災傷男女憂他男女厄壽上入  
耳卒中亡命下甲匱遭燒死準頭憂病外來殃黑發三陽黑  
氣多失官停職事波波更上發來年壽上天中有黑見閻羅  
黑氣入口死于夏顙上兄弟婦奔逃奸門切忌女相干日角  
若臨妻亦亡井部黑氣水溺死印堂退光非謬假橫飛壽上  
防逢災六十日內須應也黑氣額上父母死生來眼下子孫  
殃若見下來年壽上自然病起入冥途黑氣三陽至盜門奸  
私賊寇豈堪論更見黑氣鼻準上知君財破避無門黑生妻  
部及年上妻厄身災非是旺更兼入井下陂池切記水殃心  
莫忘黑氣朦朦散面門四季切忌小災迤若生口入氣廚竈

必定遭他毒藥人黑色天中年壽上更從地閣似煙籠又如  
黑色初發散此箇須臾命必終眉間橫入左右耳百日之中  
人定死天明天井忌失財驛馬常防遭險墜虎角頻遭虎犬  
傷人中井部水中亡年壽山根同位斷地閣爭田訟見殃若  
侵法令遭公訟大海見之奴婢逃牆壁生來合中嶽定歸泉  
下哭聲高

紫色出沒 紫色初起如兔毫將盛之時如紫草欲去之時  
如淡煙籠枯水隱隱然得土木之餘氣爲四時胎養之氣亦  
旺在四季更無休囚發皆爲吉應日亦與黃色同意矣

紫色吉凶歌 紫色天中八字分蘭臺月角得財頻法令生  
來逢印信終是刑名不及身壽上俄然一字橫家中新婦喜

分明天門川字將軍祿天井圓珠享大榮元壁福堂知積慶  
若當地閣創家居山根忽有終加職驛馬全生喜有餘元壁  
左邊遷官職山林精舍喜相須陂池位上增餘福中嶽橫紋  
貴自如

十天羅者天之凶殺之神也人亦有所像多滿面黑色四起  
爲死氣天羅白色者爲喪哭天羅青色者爲憂滯天羅玉管  
照神局又云青色深者亦主喪死黃色者爲疾病天羅如脂  
膏塗抹者爲酒食天羅眼流而視急者姦淫天羅色焦如火  
者爲破敗天羅如醉如睡者爲牢獄天羅笑語失節者爲鬼  
掩天羅氣如霧昏者爲退散天羅也

論氣色定生死訣 凡氣色者額上忽有氣如塵抹者名曰

醫無休廢六十日內死額上連髮際黑氣或白氣狀如蚯蚓橫起者名曰連天休廢二年內死左右鼻孔黑氣橫過如虛氣者名曰垂起休廢不出六日死左右取下如塵黑氣生者名曰靈光休廢一年凶死頤下拂拂如塵行連項者名曰纏命休廢八十日內死印堂上有赤白色血者名曰毀祿休廢受極刑死九十日內應鼻上忽忽如塵起或如粉塗者名曰理獄休廢主居官破位三年內死左右額上拂拂如塵起者名曰傍行休廢二年內死財破六親離厄左右兩眼忽有白氣貫入神光者名曰裁神休廢一百日內死口四邊白色旋繞者名曰守魂休廢五十日內死左右耳邊忽若塵成兩三條者名曰動海休廢一百日內刑獄死左右耳輪後氣如粉

氣者名曰飛天休廢六十日內死腦後連腦白氣如塵飛起  
成條者名曰貫中休廢三十日內主死決也

定病氣生死之訣 五臟有五氣五氣各有時春三月白氣  
入口耳鼻者死此得囚死色也餘皆倣之凡看病人青色從  
上入下者易瘥從下去上者難愈凡常白忽黑常黑忽白常  
肥忽瘦常瘦暴肥神魂常靜而恍惚似醉者色澤常清而忽  
昏濁如黯者豐足不常之變盡爲卒死之兆矣病人日冥冥  
妄視舌卷縮者謂之心炤卽日死面色慘黃唇青短縮者謂  
之脾絕不出十日死齒牙乾焦耳黑而聾者謂之腎絕不出  
旬日死口張不合眼睛反惡者謂之肝絕不出旬日死肌膚  
枯槁鼻黑孔露者謂之肺絕不出旬日死凡人目下五色併



起者不出十日死髮直乾脆者不出半月死面色忽如馬肝  
望之亦如青龍之黑不出三日死四墓發黑色者死年上橫  
黑氣者死五命廢得紫色者皆得鬼色死之人也

太清神鑑卷三



# 太清神鑑卷四

論形神 二氣未判則一體冥寂天地既形則萬物成體物之有體也則其性人之有形也則其神形神相順以成道相資以成德故人之生也有形斯有神有神斯有道神須形而始安形須神而始運蓋形能養血血能養氣氣能養神是以形全則血全血全則氣全氣全則神全兩者不可不備其或神形有餘則爲有福之兆或形神欠虧乃爲禍之基故神足于形爲貴形過神者爲賤乍可神足而形不足不可形足而神不足也論形曰夫人之生也稟陰陽沖和之氣肖天地之形受五行中正之質爲萬物之靈故頭圓像天足方像地眼目像日月聲音像雷霆血脈像江河骨節像金石鼻額像山

嶽毛髮像草木天欲高而圓地欲方而厚日月欲光明雷霆  
欲震響江河欲流暢金石欲堅山嶽欲峻草木欲秀故形也  
有陰陽剛柔之義有五形正類之體其男子也剛正雄畧乃  
得陽之宜也女人也柔順和媚乃得陰之宜也其形分於五  
行者木形長瘦金形方正水形肥而圓土形重而厚火形赤  
而上尖形正而不陷乃五形正氣其或水火相傷金木相犯  
皆爲不合之相也多招災禍之凶其形龍翔海嶽鳳戲丹墀  
獅坐龜遊虎踞馬躍攀猿舞鶴回牛浮鴈此皆天地之純粹  
間世之英才也故漢高祖有龍顏之喜玉管云卜商有堂堂  
之貌唐太宗天日之表班超則燕頤虎頭黃琬鳳睛龜背富  
貴之兆故皆顯著其寒如瘦鷺視似羊睛蛇行雀走犬暴豹

聲斯皆貧賤之形發也其理浩博非一言可盡辯也宜精思以詳之苟無其類則吉凶無驗矣故郭林宗觀人有八法一曰威爲尊嚴畏憚也如豪鷹搏物而百鳥自驚似怒虎投林而百獸自懼蓋神色嚴嚴而人所畏則主權勢也二曰厚爲風貌敦重也其量如滄海器如百斛引之不來搖之不動則主福祿也三曰清謂精神翹秀也如桂林一枝崑山片玉灑然高秀而無塵翳俊才貴也或清而不厚近乎薄也四曰古謂骨氣嚴稜也其或部位相應則爲高貴之人或濁而不清近乎俗也五曰孤謂形骨露也其項長肩縮脚斜腦偏其坐如搖其形如攫又似水中獨鶴雨中鷺鷥則孤獨也六曰薄謂體貌劣弱其形氣輕怯也色昏不明神露不藏如一葉之

舟而在重波之上見之者皆知其微薄則主貧寒也縱有衣食必夭折矣七曰惡謂體貌凶頑蛇鼠之形豺狼之聲或性躁神驚骨傷帶破主凶惡也八曰俗謂形貌昏濁也如塵埃之中物縱有衣食主<sub>名賢相法五總龜八</sub>迤滯也形與前觀人八法同大抵受氣有清濁成形有貴賤故豐厚謹嚴者不富則貴淺薄輕躁不貧則夭女人之氣欲其和形欲嚴謹言欲柔而不暴緩而不迫行坐欲端而不側視欲正而不流則大貴也

五形 人稟天地之氣而有五行之類也故木形者聳而瘦挺而直長而露節頭隆而額聳也或肉重而肥腰偏而背薄非木之善金形者小而堅方而正形短不爲之不足肉堅不爲之有餘也水形短而浮闊而厚則俯然而流也土形者敦

而厚重而實背隆腰厚其形似龜也火形者上尖而下闊上輕而下重性躁急而炎炎也故五形欲得相生無尅如木形之人木之聲高而曉其性仁而靜相之善也其或五形相尅聲音相反爲形重災禍之人也

玉管照神局同

論看形神體像 凡看形神須類物性行飛騰躍死有所肖後看氣衰旺五嶽四瀆朝對如何雖有好形神而五位無出彩者此人應事歇滅而如初也形神雖不足五嶽雖不應而有長旺色者衣食自然凡看形神須察氣色看之則萬無一失也

論形不足 形之不足者頭頂尖薄肩膊狹斜腰肋疎細肢節短促掌薄指疎唇蹇額塌鼻仰耳反臀低胛陷一眉曲一

眉直一眼仰一眼低一睛大一睛小一顴高一顴低一手有紋一手無紋睡中開眼男子女聲齒黃而露口臭而尖禿頂無髮眼深不見行走欹斜顏色痿怯頭小而身大上短而下長此謂之形不足也多疾而短命福薄而貧賤矣

論形有餘 形之有餘者頭頂圓厚腹背豐隆額闊口方唇紅齒白耳圓成珠鼻直如膽眼分黑白眉秀疎長肩膊齊厚胷前平廣腹圓垂下出語宏亮行坐端正五嶽朝起三停相稱肉膩骨細手長足方望之巍巍然而來仰之怡怡然而坐此皆謂形有餘也形有餘者令人長壽少病富而有榮矣

鶴形者三才相等眼細眉長鼻尖而小身長垂口身體上下一般細長而正地闊小五官俱好正鶴形也或行緩者單鶴



形也面部有雜鼻大口小或口大準起者孤鶴形也五色不分神氣不足病鶴形也 正鶴形 正鶴形神大貴人生來衣食不曾貧命居三館八卿位壽算仍須過百春 單鶴形 單鶴形神藝出羣生來聰俊過常人貴當富顯馳千里財帛猶豐不受貧 孤鶴形 孤鶴形神惡毒人妨兒尅子只孤身妻兒生別生離去老至須教獨受貧 病鶴形 病鶴形人命不長生來破敗少田莊中年定受貧寒苦無子無孫走路傍

鳳形者額長三停平滿耳輪貼肉山根高聳準頭圓潤眼長而尾起口如蓮眉粗而秀倉庫五官六府俱好正鳳形也其或眉尖眼尖下短或身側小鳳形也身長聳其精神緩急者

丹鳳形也如額低精神慢眉長不應是病鳳形也 正鳳形

正鳳形高貴且強生居九鼎出朝堂一生聰智多文學大

國爲臣小國王 小鳳形 小鳳形神福祿強生來富貴不

尋常中年顯達官榮盛大業洪勲遠播揚 丹鳳形 丹鳳

聰明清貴人生來榮貴且超羣足居三品公卿位祇是難爲

兄弟身 病鳳形 病鳳形神雖性靈聰明文學有聲名都

緣難得官班位縱得官班却見迤

龜形者頭圓項短身大背厚眼細口大而闊元壁朝接山根

高起正龜形也其或精神亂過者出水龜形也或諸部位有

不應然而精神美悅者戲龜形也五色不分諸位不應而多

厚黑精神足者藏龜形也 正龜形 正龜形神壽年多生

居兩輔衆難過初年名遠揚十里後者榮華萬國歌 出水  
龜形 出水龜形久必榮生來聰敏起名聲壽雖七十身孤  
獨兄弟妻兒定不成 戲龜形 戲龜形人文藝多只宜晚  
祿供山河中年雖得荷衣掛末歲須防給諫過 藏龜形  
藏龜形人衣食榮初依父母有空名年老難免飢寒苦獨力  
孤形少弟兄

犀形者頭四方印堂闊地閣厚重眼圓眉大薄五嶽正天庭  
起行步重而闊五官六府俱好正犀形也面部同而步急速  
手腰背動舉者出水犀形也面部五官六府有破不舉短促  
是入水犀形也面雖部位一同而五官不正身長側者戲犀  
形也 正犀形 正犀形神是貴人職居館殿足金銀壽年

八十人皆敬百世榮華及子孫 出水犀形 出水犀形是

正郎晚年高職坐朝堂金珠錢寶家盈萬壽算應當七十七

入水犀形 入水犀形食祿多出羣英俊衆難過壽年七

十莊田盛一世榮華爭奈何 戲犀形 戲犀形神藝出羣

生來卓立不求人錦衣玉食誰能及更壽年高六十春

虎形者頭圓項短地閣重厚九州團促眉濃口大面闊鼻大

五官六府俱好正虎形也行走急速腰身正視不定

○案此下當有

脫文此入林虎形也面部雖同精神帶慢顧視偏斜者此落坑

虎形也 正虎形 正虎形人是太僚文操武畧富偏饒生

來便有三公位老後須登駟馬驕 出林虎形 出林虎形

性正剛生來聰智足文章初年榮達高官職位入星郎耀四

方 入林虎形 入林虎形是正郎名傳聲價最高強只緣

心志多藏毒暗恐消磨壽不長 落坑虎形 落坑虎形不

可親毒忿生來愛陷人錦帛資財雖積畜爭知壽不過多春

獅子形者額方眉大口闊鼻大耳大眼大身肥天地相應三

才平滿倉庫厚元壁起五官六府俱好正獅子形也若或面

部雖同身小眼部不應小獅子形也行慢身重多精神者坐

獅子形也若行步踟躕瞻視不正精神美悅者戲獅子形也

正獅子形 正獅子形額正方眉濃眼大口須長九州高

聳耳朝口出世須教作郡王 小獅子形 小獅子形主晚

榮生來榮顯負清名錦帛錢財成巨萬自宜營運保前程

坐獅子形 坐獅子形是貴人生來衣食足金銀清資定入

公卿位壽算仍須八十春 戲獅子形 戲獅子形衣食足

位歸侯相鎮山河玉寶珠金多積畜一生快樂任婆娑

龍形者五獄起三才平滿天地相朝鳳節豐濃印堂起方寸  
邊地起人門闊眉分八彩目長二寸耳長四寸五官六府俱  
好者正龍形也男卽大貴之相女卽妃后之貴也若有五色  
者定五龍之形也別述青黃赤白黑五品相儻或行步不同  
面部有雜一處不應卽是臥龍形也卽主多祿之位或帶虎  
頭燕額卽是山龍形也主將軍節度之權面上二停身一停  
此主侯伯之位面上一停身占二停此主將帥之職也 正  
龍形 正龍天下貴無雙上天儀表萬邦王一流河水須鎮  
斷四方歸貢走梯航 臥龍形 臥龍合主三台位闡世文

章天下名官爵定須居一品及第人皆震一鳴 山龍形

山龍本是將軍位文武俱全鎮廟堂三代侯門生貴子出爲兵帥入爲王

五短之形 一頭短二面短三身短四手短五足短五者俱短骨細肉滑印堂明潤五嶽朝接者少卿公侯之相也雖俱五短而骨麓惡五嶽缺陷則爲下賤之人也其或上長下短則多富貴上短下長主居貧下矣

五長之形 一頭長二面長三身長四手長五足長五者俱長而骨貌豐隆清秀滋潤者善如骨肉枯槁筋脈迸露雖俱五長反爲貧賤之輩也或有手短足長者主貧而賤足短手長者富而貴也

論聲 人之性動於心而形於聲故聲者氣實藏之氣搆衆

虛而成響內以傳意外以應物人有聲猶鐘鼓之響若大則

聲宏若小則聲短神清氣和則聲溫潤而圓暢也神濁氣促

則聲焦急而輕嘶也

玉管照神音西  
噎也又馬鳴也

故貴人之聲出於丹田

之內與心氣和通汪洋而外達何則丹田者聲之根也心氣

者聲之端也舌端者聲之表也夫根深則表重根淺則表輕

玉管照神云是知聲  
發於根而見夫表也

若夫清而圓堅而亮緩而烈急而和長

而有力有威若大音如洪鐘發響鼙鼓震響音小似寒泉飛

韻琴徽奏曲接其語則粹然而後動與之言則悠然而後應

是以聲之善者遠而不斷淺而能清深而能藏大而不濁小

而能新細而不亂出而能明餘響激烈笙簧宛轉流行能圓



能方如斯之相並主福祿長年若夫小人之聲發於舌端喘  
急促而不遠不離唇上素雜而斷續急而又嘶緩而又澀深  
而帶滯淺而帶躁或大而散或長而破或輕而不勻或繚繞  
而無節或槎崖而暴或煩亂而浮麓濁飛散蹇淺訥澀或如  
破鐘之響敗鼓之聲或如寒雞哺雛餓鴨哽肉或似病猿求  
侶或似孤鴈失羣細如秋蚓發吟大似寒蟬晚噪雄者如犬  
暴吠雌者似羊孤鳴如斯之聲皆爲淺薄也或男作女聲細  
者一世孤窮

王管昭神局註云謂其柔細而不剛烈也

女作男聲暴者主一世妨

害

王管昭神局註曰謂其剛暴而不和也

然則身小而音大者吉身大而音小

者凶身聲相稱者善或乾濕不齊者謂之羅網聲或小或大  
者謂之雌雄聲或先進而後急或先急而後進或聲未止而

氣絕或聲未舉而色先變皆薄淺之相也是以神定於內而  
氣和於外則聲安而言有先後之序乃無變色也苟神不安  
必氣不和則其言先後失序辭色雜錯皆是小人薄劣之相  
也且聲如破筒者富破瓦者賤破木者貧破竹者苦公鷺聲  
者多破散公鴨聲者多賤徒暴如豺狼者毒害多汪聲深堂  
者爲福人故聲細如啼貧賤孤恹聲粗如哭災禍相逐聲音  
明快意象遠大聲音嫩嬌家活水消人之稟五行之形其聲  
亦有五行之象故木音高暢玉管照神局註曰嘹高暢激越而和火音焦烈  
玉管照神局註云發之太嚴如火之烈其  
或躁戾淺暴者謂之火濁不善之應也金音和潤玉管照神局註  
曰和則不戾潤則不枯抑之爲清擊  
之爲純又如桐篁奏響玉磬流音也水音圓急玉管照神局註曰圓而清  
急而暢堅而不散長而有緒土音沈厚沈則不淺厚則不薄  
或條達而流或鏘鏗而韻洋洋發在嚙喉之間

也若與形相生則吉相尅則凶爲聲者分三主可決成敗耳

初聲高者初主強中聲薄者中主強後聲微者晚年卑是以

聲音主發閉之人不可不善不善者並爲凶惡必多災難形

厄有官則多失位有財則破散男則不能保其室女則不能

保其家矣

玉管照神局并月波洞中記同

凡聲最難辨大抵舌頭圓全清潤

響快不宜焦急沈滯刑破短促若人大而聲小者非遠器也

人小而聲大者良器也又須於五行形神論聽五聲合與不

合刑與不刑斷制不可言論也畧具五聲訣於後

金聲韻

長清響遠聞金圓潤則貴金破則賤土聲韻重響亮遠聞重

則貴近薄則賤也火聲清烈調暢不懦完潤而慢則貴焦破

則貧賤木聲韻條達初全終散沈重則貴如輕則賤也水聲

韻清細響急長細則貴如輕則賤也論五聲又不以形類蓋  
爲聲無形但聽而會意則詳酌其理然後較其吉凶萬不失  
一也

五音 五行散爲萬物人生萬物之上而聲亦辨其故木音  
嘹唳高暢激越而和火音焦裂躁怒如火烈烈金音和而不  
戾潤而不枯玉磬流音水音圓而清急而暢或條達而流或  
激而發土音深而不淺厚而不薄渾然如發在咽喉之間也  
與形相養相生者吉與形相尅相犯者凶

行部 行者進退之節去就之義所以見其貴賤之分也人  
之善行如舟之遇水無所往而不利也不善行者猶舟之失  
水必有澡汨沒溺之患也是以貴人之行如水而流下身重

而脚輕

玉管照神局註曰身端直如水之流下脩然而往體不搖也

小人之行如火炎上

身輕而脚重

玉管照神局註曰如火動其身不正其脚搖而動

故行不欲昂首而踈

又不欲側身而折太高則亢太卑則曲太急則暴太緩則遲

周旋不失其節進退各中其度者至貴人也且行而頭低者

多智慮行而頭昂者少情義行而偃臂者愚而下行而身平

者福而吉如虎步者福祿如龍奔者權貴如鷺鴨之步者家

累千金如馬鹿之驟者奔波一世如牛行者富而壽如蛇行

者毒而夭雀跳者食不足猿躑者苦不停龜行者福壽鶴步

者天祿鴈行者聰明而賢鼠行者多疑而賤行如流舟者富

貴行如急犬者微賤踳踳而來者性行不吉泄泄而往者財

食有餘脚根不至地窮而夭壽發足急如奔走者賤居人下

行而左右偷視者心懷望竊行而回面後顧者情多驚亂大體行之貴也腰不欲折頭不欲低發足欲急進身欲直起走欲闊端然而往不凝滯者貴相也行者進退去就之間欲中規矩不及徐動有理者善也肥人形重行欲如飛瘦人形輕行欲如疑此乃貴相若斜身偏肩如鵲之跳如蛇之趨者皆不善也

論坐 坐所以安止欲沈靜平正身不斜不側深重盤石腰背如有所助終日不倦神色愈清者貴相若如醉如病如有所思者皆不善相也 又云人之行者屬陽坐者屬陰故行者體陽爲動坐者像陰爲靜凝然不動者坐之德也坐而膝搖者薄劣之人也坐而頭低者貧苦之輩也坐而轉身回面

者毒坐而搖頭擺腦者狡公然如石不動者富貴恍然如猿不定者貧賤坐定神氣不轉者忠良福祿坐定亂色變容者凶惡愚賤坐之爲道不端正其相不令能謹能嚴其福曰添也

論臥 臥者體息之期也欲得安而靜恬然不動者福壽之人也如狗之蟠者上相如龍曲者貴人睡而開口者短命夢中咬牙者兵死睡開眼者惡死道路睡中藝語者賤中奴婢仰形如屍者貧苦短命臥中氣麓如吼者愚濁易死合面覆臥者餓死就牀便困者頑賤愛側睡者吉慶壽多展轉者性亂少睡者神清而貴多睡者神濁而賤臥易覺者聰敏臥難醒者愚頑喘息不聞者高壽喘息潤勻者命長氣入多壽氣

少短命氣出噓噓之聲者卽死喪夫睡臥輕搖未常安席者下相也

論飲食 氣血資之以壯性命繫之以存者飲食也故食物不欲語嚼物不欲怒食急者易肥食遲者多疾食少而肥者性寬食多而瘦者性亂飲緩者性和食如啄者貧斂口食者淳和哆口食者不義食而齒出者貧苦短命嚼似牛者福祿食如羊者尊榮食如虎者將帥之權食如猿者使者之位邊食邊顧終身窮飢食快而不留詳而不暴嚼不欲聲吞不欲鳴矣

餘與五  
總龜同

太清神鑑卷四



太清神鑑卷五

論骨肉 立天之道曰陰與陽立地之道曰柔與剛故地者具剛柔之體而能生育萬物也山者地之剛也土者地之柔也剛而柔則宰律而不秀柔而剛則虛浮而不實故人之有骨肉者亦若是矣故肉豐而不欲有餘骨少而不欲不足有餘則陰勝於陽不足則陽勝於陰陰陽相反謂之一偏之相肉當堅而實骨當直而聳肉不欲在骨之內爲陰之不足骨不欲生肉之外爲陽之有餘故人肥則氣短馬肥則氣喘是肉不欲多骨不欲少也乃陰陽和平剛柔得中骨肉相稱理之善矣故暴肥氣喘速死之兆肉不欲橫橫則性剛而多橫肉不欲緩緩則性柔而多滯遍體生毛則性剛而又急肥不

欲紋滿者近死之應肉欲香而煖色欲白而潤皮欲細而滑  
皆美質也肉重而麓皮硬而堆塊色昏而枯皮黑而臭癰癰  
多者非令相也若人神氣不明筋不露骨肉不居體皮不包  
肉皆死之兆也又云肉充爲膚肉欲寬肥人宜輕清不露瘦  
人宜堅重不枯反此者皆不善若爲肉橫者爲帶殺肉病此  
主凶暴貧夭也 魏巍峯嶽堅立萬福堅剛而峻鬱茂而秀  
此乃天地之骨也人之有骨節亦象山嶽金石欲峻而不欲  
廣欲圓而不欲粗瘦者不欲肉少而骨露露者多艱少壽也  
玉管照神局註云肉不輔骨則骨露乃多難少福之人也肥者不欲骨隱而肉重重者乃  
玉管照神局註云肉肥重乃遲滯之人也逆滯天壽也  
肥不欲滿或滿而盈者乃速死之人也骨與  
肉相稱氣與色相和者福祿之相也背攢而體偏骨寒而肩

縮不貧則天不夭則貧矣

玉管照神局註云謂肯巒而體偏骨寒而肩縮凡物有萬狀人有萬

形亦有折除或窮而壽或富而夭故云不貧則天也

日角之左月角之右有骨直起名

金城骨位至公卿印堂有骨稜而至天庭名天柱骨從天庭貫頂名伏犀骨位至三公半頂以前主初年半頂以後主晚年或有側斷者有連滯之失面上有骨卓起者顴骨也主有權勢顴骨相連入耳名玉梁骨主壽考自臂至肘名龍骨象君欲長而大白肘至腕名虎骨象臣欲短而小故龍銜虎則福虎銜龍則賤夫骨之法欲峻長而舒圓而堅直而節應緊滑而不麓惡筋而不纏則爲上相也且人雖有奇骨亦須形相稱色相助方成令器苟諸位不應雖福壽而不貴也宜細詳之

玉管照神局同與五總龜相骨同

又

骨者體之幹所受宜清滑長細內

外科相稱若骨堅半輕細與骨肉薄者近於寒也大抵須得聳直不橫不露與肉副應者爲善相也董公論此骨法曰鳳凰骨鸚鵡骨駱駝骨犀牛骨猿骨此說微妙難曉用意深者亦可知也

論額部 分一面之貴賤辨三輔之榮辱莫不定乎額也故天庭天中司空俱列乎額是非攝諸部位繫人之貴賤也故其骨欲隆然而起聳然而闊其峻如立壁卽堂上至天庭有隱隱骨而見者少達而榮邊地山林皆欲豐廣坑陷貧賤額兩邊輔角骨起長大者三品之貴天中天庭司空中正印堂五位得端正明淨總顯達之人也若狹小而髮亂低覆者愚而貧賤也額面小窄至老貧厄額大面方至老古昌額角高

聳職位崇重天中豐隆仕宦有功額小面廣貴處人上額方

峻起吉無不利額瑩無瑕一世榮華

餘與瑋琳洞  
中秘密經同

論頭部

頭部者處一

體之尊爲百骸之長羣陽會集之府

五行正宗之鄉高而圓藏虛而大者令首也天高峻而清圓

故三光得以照萬物無爲而自運故道濟天下而體常不動

曲成萬物之性而常不流是以頭之像天之形也欲得峻而

起豐滿而圓像天之德也欲得儼正在上不側不搖若夫尖

薄而小缺陷而傾者貧下之儀也得坐低斜或搖或擺賤劣

之相也故骨欲豐滿而起峻秀而凸短則欲厚長則欲方頂

突者崇貴側陷者天薄頭皮厚者足衣食頭皮薄者貧賤皮

青者吉善皮白者下賤皮黃者貧苦皮赤者凶災頭有餘皮

者財食豐足頭有肉角者必大富貴左偏損父右偏損母耳  
後有骨名壽堂骨耳上有骨名玉樓骨並主官祿行不欲搖  
頭坐不欲低頭皆爲貧弱之相也是以身小頭大卑賤之輩  
身大頭小觸事不了頭不應身先貴後貧頭通四角高權超  
卓牛頭四方富貴吉昌虎頭高起福祿無比狗頭尖圓悲涕  
流漣鹿頭側長志意雄剛獺頭橫闊心意豁達象頭高厚福  
祿長壽犀牛率律富貴無失駝頭蒙洪福祿永終蛇頭平薄  
財祿寥落貉頭尖銳窮厄無計 額紋 額之有紋貴賤可  
斷若額方廣豐隆而有好紋者則爵祿崇也如額尖狹缺陷  
更有惡紋者則貧賤無疑矣三紋偃上者名曰偃月紋主朝  
郎三紋偃上一紋直貫者名曰天柱骨紋主節察武臣王字

紋者主公侯天中豎紋下至印堂名曰懸雲紋主卿監印堂  
兩紋直上長三寸者名曰鶴足紋主刺史三紋圍繞者早喪  
父一紋橫而曲者名曰蛇行紋也主送路井字紋者主員外  
川字紋者主憂慮刑喪十字紋者主吉昌田字紋者主富貴  
山字紋者侍從之榮貴乙字紋者京朝之要職水印紋者主  
榮貴顯達額上亂紋交紊則貧苦多災婦女額有三橫紋者  
則妨夫害子貧夭俱至矣

枕頭部 人之骨法中貴者莫不出於頭額之骨頭骨額骨  
之奇者莫不出於腦骨成枕人之有此如山石有玉江海有  
珠一身恃以顯榮者也故人雖有骨奇異亦須形貌相副神  
氣清越方受天祿不然恐未盡善也夫腦後名曰星臺若有

骨者名曰枕骨凡豐起者主其人生富壽如或低陷必主貧夭二骨皆圓者名曰三才枕主使相四角各有一骨聳起中央亦聳者名曰五嶽枕主封侯兩骨尖起者名曰雙龍枕主節樞將軍之貴四邊高中央凹者名曰車輪枕主公侯三骨並者名曰連光枕小者爲二千石大者爲將相一骨彎仰上者名曰偃月骨主卿監一骨彎俯下者名曰覆月枕主朝郎兩骨俯仰者名背枕骨主武關防又主高文貴顯上一骨下二骨分排而圓者名三星枕主兩副制官職兩方骨皆起角者名曰四方枕大者爲二千石小者全祿一骨聳起而圓者名曰圓月枕主任館殿清職上方下圓者名曰垂露枕主爲員外郎上下圓稜似杯者名曰玉樽枕大者主卿相小者



主刺史三骨直起一骨下橫承之者名曰山字枕主聰明富貴一骨圓一骨方者名曰疊玉枕主富而榮一骨聳起而尖峻者名曰象牙枕主兵將之權骨起四角者名曰懸斜枕主節度武臣一骨橫截者名曰一陽枕主巨富壽高大凡骨得近下者過腦而易辨近上者淺而難驗矣骨者一定之相有之則應也故古人有言頭無惡骨面無好痣殆不爽矣

瑋琳洞中

秘密經同

論面部 面之三停自髮際下至眉間爲上停自眉間至鼻準爲中停自準人中至頰爲下停夫三停者以像三才也上像天中像人下像地上停長而豐隆方而廣闊者主貴中停隆而準峻而靜者主壽也下停方而滿端而厚者主富也若

上停尖狹缺陷者主多刑厄之災妨尅父母卑賤之相也中停短小偏塌者主不義不仁智識短少不得兄弟妻兒之力亦中年破散也下停長而狹尖而薄者主無田宅生貧苦而艱辛也三停皆稱乃上相之人矣

論眉部 眉者媚也爲兩目之翠蓋一面之儀表是謂目之英華主賢愚之辨也故欲疎而細平而闊秀而長者性聰敏也若夫麓而濃逆而亂短而蹙者性凶頑也眉過眼者富短不覆眼者乏財壓眼者窮逼頭昂者氣剛卓而豎者性暴尾下垂性懦眉頭交者貧薄妨兄弟毛逆者妨妻不良骨稜起者凶惡多滯眉中黑痣聰貴而賢眉高居頭中年大貴眉生白豪多壽上有直理者富貴橫理者貧苦中有缺者多奸計

薄如無者多狡佞是以眉高聳秀威權祿厚眉毛長垂高壽無疑眉色光澤求官易得眉交不分早歲歸墳眉如彎弓性善不雄眉如初月聰明超越眉垂如柳貧浪無守彎彎似蛾好色性多眉覆眉仰兩母所養眉如高直身當清職眉頭交破逆邇常有也

論眼部 眼本清靜所以生神爲木星欲長秀分明白如玉黑如漆聳耳入鬢者大貴之相也若短小而明有異光輪動爍人者此又貴而有壽若睛凸四露視有神彩者亦主權殺或大而無光長而無神外無上下堂赤脈相侵睛視不遠眼頻動搖睡沉重不合目瞳黃者不善相也董正曰眼頭如眼尾開合含異光者神仙之相非凡相也更有白刃當前還目

驚潰而眼不及閃者此主貴權上將之相也

腰背法論

行步緩而輕坐起正而實是謂有腰前視如負

物後視如帶曰是謂有背有背無腰初發後滯有腰無背初困終亨於是法中亦多憂疑兩者全備則一生享富貴毀辱不能及利害不能動卽有德之人且相腰背之法又不以魁偉而取但小以應小大以應大皆可矣故腰背有旋生者舉止重正面開精神藏陰隲滿氣色明然後能生欲知生之時金以四木以三水以一土以五火則不能生也欲漸不欲頓欲停不欲偏如壅腫肥大乃肉滯矣非謂之腰背則牛行步緩取之得矣

觀妙經腰背論同上

論腰

腰者爲腹之山如物依山以恃其安危也欲得端而

直闊而厚者福祿之人也若夫偏而陷狹而薄者微賤之徒也或薄短者多成多破廣長者保祿永終直而厚者富貴也細而薄者貧賤凹而陷者窮下裊而曲者輕劣蜥蜴腰者性寬而善尖蜂腰者性鄙而和夫臀高而腰陷者主賤腰高而臀陷者主貧大體腰欲端闊臀欲平圓則稱也

論背 背者一身之基址也人不論肥瘦輕重皆欲有背夫有背者號爲有上須得豐隆不俗如龜背而廣厚平闊前看如昂後看如俯者福相也或屈而視下頭低而蟠者非貴相也

論腹 腹者內包六腑圓長者可辨其貧富下養元靈扁大者可知其愚智故腹欲得圓而大者智而榮貴扁而長者愚

而卑賤大而近下者名光朝野小而近下者清聰長者圓如玉壺者巨富窄如雀肚者至貧圓而近下者富貴圓而近上者貧賤尖而長者愚而賤橫而圓者智而榮如抱兒者富貴如蝦蟆者貧賤貪婪如牛肚者積財蹇縮如狗肚者賤如羊肚者貧如衣裘者富如筭箕者貧寒肚有三王者貴而壽肚有好痣者智肚端而妍者才巧肚扁薄而醜者愚苦 又云腹者包容臟腑乃身之營也欲闊大而垂囊若橫凸者非也或若雀腹鼠腹不爲貴相也

論臍 臍者是筋脈會要之地爲臟腑總領之關故臍欲深而闊不欲淺而狹深而闊者智而有福淺而狹者愚而多賤生近上者衣食生近下者貧薄低向下者有識突向上者無

智圓而正者善士斜而醜者惡人藏而深者福祿凸而出者  
賤矣大能吞物者名榮邦國小而一撮者惡傳千里

論四肢 夫手足者謂之四肢以象四時加之以首謂之五  
體以象五行故四時不調則萬物夭闕四肢不端則一生困  
苦五行不和則萬物不生五體不稱則一世貧賤是以手足  
猶木之枝幹節多者則不材之木也故手足欲軟而滑淨筋  
骨不露其白如玉其直如筍其滑如苔其軟如綿者富貴之  
人其或硬而麓大筋纏骨出其麓如土其硬如石其曲如柴  
其肉如腫者皆爲貧徒矣

論手 手者其用所以執持其情所以取舍故纖長者性慈  
而好施厚短者性鄙而好取手垂過膝者間世英賢手不過

腰者一生貧賤身小而手大者福身大而手小者貧手端厚者福手薄削者貧手麓硬者下賤手細軟者清貴手暖香者清華手臭汗者濁下指纖而長者聰俊指短而禿者愚賤指柔而密者積蓄指硬而疎者破散指如春筍者清華富貴如鼓槌者頑愚如剝葱者食祿如竹節者貧賤手薄硬如雞爪足者無智而貧手倔強如猪蹄者愚魯而賤手軟如綿囊者至富手皮連如鵝足者至貧掌長而厚者貴掌短而薄者賤掌硬而圓者愚掌軟而方者福四邊豐起而中凹者富四畔薄弱而中凸者財散掌潤澤者富掌乾枯者貧掌紅如喫血者榮貴黃如拂土者至貧青色者貧苦白色者寒賤掌中心生黑痣子智而富掌中四散多橫理者愚而貧也



相掌文

一井二井錢財萬頃橫紋過指最爲強壽限無過

得久長若得掌中生十字一生富貴坐高堂手背紋多作事

蹉跎成敗幾次方得成一紋華蓋二紋破財二紋多成多

敗尅妻若說華蓋紋初主不安寧交入中限後末主事方成

又云手之有紋者亦象木之有理木之紋理美爲奇材手之

有美紋者乃爲貴質也故手掌不可無紋有紋者上相無紋

者下賤紋深而細者吉紋麤而淺者賤掌上三紋上畫應天

象君象父定其貴賤中畫應人象賢象愚辨其貧富下畫應

地象臣象母主其壽天三紋瑩淨紋無破者福祿之相也縱

理多者性亂而災橫理多者性急而賤豎理直上貫指者百

謀皆遂亂理散出指縫者事事破散紋細如亂絲者聰明美

祿紋粗如橫木者愚魯濁賤紋如亂挫音到者一世貧苦紋如撒糠者一世快樂有穿錢紋辨錢紋者主進資財有端笏紋插笏紋者文官朝列十指上紋如旋螺者榮貴傍瀉如筭筐者破散十指上橫紋三約者貴多有奴婢十指上紋橫一鈎者賤被驅使有逸紋者將相有血紋者無印有偃月紋車輪紋者吉慶有陰陽文延壽紋者福有印紋者貴田紋富井紋貴十字者祿有策紋上貫指名光萬國有按劍紋而加權印者領軍四海有法關紋者凶災逆而妨害有夜叉紋者下賤而愈窮大凡紋雜主大好而或叉破者皆爲缺陷無成之相矣

手背紋

手背之紋其驗尙矣故有五和之理五者皆近指

上兩節者謂之龍紋主天子之師下節一爲公侯中節一爲使相無名指有者主卿監小指有主朝郎大指有主巨富手背五指皆橫文者主封侯王立理貫者主拜將相手背食指之本亦謂之明堂有異紋黑痣子主才藝高貴若成飛禽字體者又爲清顯之貴大指本有橫紋者謂之空谷紋主寬裕無所不納主大富若有繞腕紋周旋不斷者謂之玉釧紋主人敬愛一紋二紋者主朝帝之榮三紋以上者主翰苑之貴男女皆同其紋須得周匝若或斷者絕者取證無驗矣

爪部 爪之爲相亦可擇其美惡見其賢愚也尖而長者聰明堅而厚者壽禿而麓者愚鈍缺而落者病弱色紅而瑩者主貴色黃而薄者主賤色青瑩者忠良之性色白淨者閒逸

之情如桐葉者榮華如半月者快樂如甌瓦者伎巧如板瓦者淳重如尖鋒者聰俊如皺石者愚下

論足 上載一身下運百體一爲身之良馬一爲地之體象故雖居其至下而其功至大是可別其妍醜而審其貴賤也欲平而厚正而長賦而軟乃富貴之相也不可側而薄橫而短粗而硬乃貧賤之質也是下無紋理者下賤足下有黑痣者二千石祿雖大而薄者賤雖厚而拘者貧賤脚下賊跟者福及子孫脚下旋紋者名舉千里脚下薄如板者貧愚脚下凹容魚者富貴足纖長者忠良之貴足指齊端者豪選之賢足厚四寸者巨榮極富足排三德者兩省之權大體貴人之足小而厚賤人之足薄而大焉 足下細軟而多紋者貴相

也麓硬而無紋者貧賤足下有龜紋者二千石祿足下有禽  
紋者八位之職足下五指有五策紋者平生賢哲足下有井  
紋者升朝之官足下有錦繡紋者食祿萬鍾足下有紋如花  
樹者橫財無數足下有紋如剪刀者藏鏹巨萬足下有紋如  
人形者貴壓千官有三策紋者福而祿有八螺紋者富而貴  
兩小指無則是也兩小指皆有謂之十螺紋主性節愷十指  
皆無螺紋者多破散矣

太清神鑑卷五



太清神鑑卷六

黑痣部 夫黑痣者若山之生林木地之出推阜山有美質則生善木以顯其秀地積汚土則長惡草以支其濁是以萬物之理無所不然故人之有美質也則生奇痣以新其貴生有濁質則生惡痣以表其賤故漢高祖左股有七十二黑子則見帝王之瑞相也凡黑痣生於顯處者多凶生於隱暗之中者多吉故生於面者皆不利也黑痣其色黑如墨赤如硃善也帶赤色者主口舌鬪競帶白色者主憂刑帶黃色者主遺忘失脫此文理之辨相也 頭面黑痣 生髮中者主富壽近上者尤猛貴額上有七星黑者主大貴天中主妨父天庭主妨母司空妨父母印堂心主貴兩耳輪上主富耳內主

壽頤上主財眼眇上主作賊山根上主尅害山根下主兵死  
鼻側主病苦死目上窮困多眉中主富壽唇上主吉利鼻頭  
主妨害刀厄鼻梁主蹇滯人中主求婦易口側聚財難口中  
主酒食舌上主虛言唇下主破財口角主失職承漿主醉死  
左廂主橫死高廣主親妨尅陽尺主客死輔角主兵死邊地  
主外死轉角主貧下山林主蟲傷虎角主軍門劫門主弓箭  
死青路主客道死太陽主婦吉魚尾主井亡姦門主刀殺天  
中主水阨元中主清慎夫坐主喪妻長男主尅長子中男主  
尅中兒次男主尅次兒金匱主破散書上主無職學堂主無  
學命門主火厄僕使主爲賤嬰門主飢寒小吏主貧薄中堂  
主尅妻外宅主無屋奴婢主妨奴雙坑塹主落崖陂池主溺



水匱主客亡三陽主縊死盜部主奸竊兩廚主乏食祖宅主  
移屋大海主水厄年上主貧困地角主少田宅牢獄主刑厄  
之災也手足黑痣兩肘內近上謂之厄門主病厄兩肘

近下謂

原闕

壁主富貴兩肘後主富財兩肘頭主災厄兩臂肘

屈交中謂之後收近腕謂之前收主伎巧兩肘外謂之城社

主貴兩腋下謂之金匱主富兩腋畔謂之絲堂主蠶桑兩曲

池穴外謂之神庭主邪妄曲池穴裏大骨上謂之盜部主被

盜兩臂外謂之厄門主刀傷兩掌中主富貴兩手皆主才巧

兩腿之上謂之福府主驅使奴婢兩腿後謂之得庭主福德

旺相兩曲膝後謂之財苑主牛馬六畜兩跨骨上下謂之

有威勢兩膝上謂之玉府主蓄財帛兩膝刃骨上謂之勞

源主奔波勞苦兩脚底謂之寶藏主封侯伯足指間謂之外  
庫主多僕相也 身體上下黑痣 兩乳上謂之左右倉主

積財穀兩乳中謂之男女宮主宜男女兩乳下謂之左右庫  
主積金帛兩乳間當心者謂之福苑主壽而樂臍中謂之龍  
關主福智生貴子臍下兩傍謂之左荒右野主貴而樂腹橫  
紋兩旁謂之逸堂主性閑雅富貴快樂咽喉下近上者謂之  
天柱主得人提攜近下者主傷死項上謂之勢源主有威權  
之吉腦後骨上謂之壽堂主多壽考腰當中心謂之四大海  
主守官邊庭不返而死兩臂辨者主有財穀

男兒貴格 眼勢入天倉眉清目更長準圓年壽起法令貫  
頤堂兩眉過耳聳唇丹口四方承漿朝地角色正見神光起

背如披甲眉清額又方官高名四海萬古播忠良 又云眉  
爲華蓋眼爲星華蓋高兮眼貴明地勢朝天乘步穩必當年  
少作公卿

兩府格 額廣而平天庭不陷鼻隆而直地闊不尖瘦人有  
肩背肥人神愈清邊廣地廣龍骨與虎骨相成肉光滑眉秀  
輕完滿蘭臺廷尉分明耳貼肉而生分明爲五岳朝正口傍  
有肉起不論肥瘦天倉不陷骨隆而肉稱色正而光聲不論  
大小清圓不破肩隆有背有胸上長下短手足龍虎相吞目  
不論大小神藏而不露眼囊大而藏睛神貴不亂厚而不俗  
坐穩行輕此乃兩府格也

兩制格 瘦人額廣肥人額平色正肉滑髮細鬢清目藏神

而遠天倉不陷鼻隆而直地角不尖瘦人肩背厚肥人神愈  
清邊廣地廣龍骨與虎骨相成君臣相稱耳聳金匱平眉輕  
清秀色正而明

正郎格 瘦人色正肥人不俗精神隱藏鼻直口方肩背豐  
隆瘦人肩背不寒肥人骨肉相稱舉止自重

員郎格 面目神藏而遠額方骨聳金匱方平瘦人肩背不  
寒肥人骨肉相稱舉止貴氣自重

男豪富 耳聳大兼長眉疏口四方背隆如負物胸起似昂  
藏鼻直兼圓準色老輔神光二陽成不陷顴骨插天倉手足  
如綿軟雙條壽帶長不唯身主富更定子孫昌

長壽祿 耳聳勢兼長眉清口四方額方分日月眼下露神

光鼻直兼圓準頤方法令長腦圓成玉枕地角輔承漿牛項兼鸛目肩隆井竈藏骨剛過上壽清德壽無疆

天壽 眉促又相連唇輕額又尖鼻低橫有骨頭細却無肩眼露還無壽形寒不老年額虧邊地窄輪反耳朝前色嫩兼生火聲焦命豈延眼光浮泛露三十又黃泉

先賤後貴 額小初年滯神清色且牢氣寒神自遠勢怯意偏豪廣額終成器頤完祿位高色黃雖未發五岳已相朝莫道多屯滯逢時自發苗不唯官祿位財帛自相招

先富後貧 額廣榮初歲神清色不牢鼻高無臉骨肉薄起聲焦掌厚還筋露臍深耳不朝背雖如負物胸薄不生豪色嫩初生好中年禍必招君看今已富終主自蕭條

四相不露 眼睛露黑白分明不爲露鼻露竅山根正不爲  
露口露齒唇不蹇不爲露耳反輪貼肉生不爲露又云一露  
二露有視無禪露齒結喉身不自由鷺鷥類鶴終是不足更  
看骨法形氣決之

餘與前同

三停 上停長者大吉昌中停長者近君王下停長者皆庸  
俗遠走他方主不良 又云身三停相稱及上下勻調則爲  
富貴之人也上長下短背聳三山則爲公卿之位上短下長  
腰身怯薄一生奔波貧苦之輩矣

五大 五大之形一頭大二眼大三腹大四耳大五口大五  
大者須得生成無缺陷則主富壽矣或頭大而無角眼大而  
昏濁腹大而不圓垂耳大而無輪廓口大而唇薄則反主貧

賤也

八大 八大者眼雖大昏且濁鼻雖大梁柱弱口雖大兩垂角耳雖大門孔薄頭雖大無骨著聲雖大宮商虧面雖大薄却皮身雖大停不齊以上八者如不相應則反爲貧賤之人也

五小 五小之形一頭小二眼小三腹小四耳小五口小若五者端正無缺陷而俱小者乃貴相也其或三四小而一大者則主貧賤若夫頭小而角眼小而清秀腹小而圓垂耳小而輪廓成口小而唇齒正則反爲貴人也

八小 眼雖小秀且長鼻雖小梁柱直口雖小稜且方耳雖小堅且圓頭雖小平且正聲雖小宮且高面雖小清且朝身

雖小正且齊以上八者有如相應端美則爲富貴之人也  
六賤 六賤者額角缺陷天中薄下爲一賤背胸俱薄爲二  
賤音聲雌散爲三賤耳目斜視爲四賤鼻曲低塌爲五賤目  
無光彩爲六賤有此六賤者主爲供役也

六極 六極者身大頭小爲一極男主妨婦女主妨夫額狹  
而小爲二極不得父母之力目小爲三極主無見識又主不  
得朋友力耳小爲四極主壽命短促鼻小爲五極主無爵祿  
有官亦多失位口小爲六極主飢寒犯此六極者乃寒賤之  
人也

六惡 六惡者一曰羊睛直視主性不仁常懷毒害二曰唇  
不掩齒主性不和難共交往三曰結喉主妨妻殺子多招災



厄四曰頭小主貧而夭五曰三停不正主貧而賤六曰定立如走主奔波寒苦有此六惡不可與同處矣

男尅子孫 兩眼如離舍唇寒鼻準尖髮麓眉又重骨弱下垂肩卓立如寒勢頭低步縱前三陽低小小妻室愈難全色嫩多財破聲雌沒穀田六親難偶合晚歲定孤眠

相無兄弟 耳反家門破頤尖兄弟孤假饒三兩個譬似不如無

孤獨無妻 人生孤獨相何如骨頰高兮氣不和更兼魚尾枯無肉妻子官中似有磨

帶殺格 兩眼如狼目眉昂勢似侵神凶兼外射笑語却生嗔舉止如鷹坐戈鉞生掌紋色輕兼帶火聲大返雌音鼻準

尖無信斜窺定有刑須知三角眼法死不須論

辨美惡有二十 頭雖圓折腰肢額雖廣尖却頤骨雖峻皮

却麓鼻雖厚梁柱低髮雖黑麤且濃眼雖長眉且蹙背雖隆

手如枝胸雖闊背成坑舌雖紅口吹火唇雖方齒不齊腰雖

厚行如馳脚雖厚麓無紋身雖大聲音細面雖白身麓黑肉

雖豐結却喉面雖短眼却長氣雖清行步欲語雖和神似癡

色雖明視東西坐雖正食淋漓行止二十種皆有折除惡善

相雜若失相者或富則夭或壽則貧或貴則貧或先富後貧

或先貴後賤宜精察而裁之

女子相 一陰一陽其道不可亂一剛一柔其道不可易確

然處乎上者天也隕然處乎下者地也天以剛健爲道地以

柔和爲德是天地之常儀乾坤之大理也且人之生也稟陰  
稟陽分柔分剛男資純陽之質也故其體剛而用健女受純  
陰之形也故其體柔而用弱若夫男子者形反柔而懦性反  
雌而弱女人者形反剛而勇性反雄而暴皆非得中正和平  
之美是得差忒鬱勃之氣也故女體性柔和儀貌秀媚者富  
貴貞潔之良心性剛暴形質雄惡者貧賤凶災之兆也畧舉  
此見女人之大槪也

女人九善 頭圓額平爲一善骨細肉滑爲二善髮黑唇紅  
爲三善眼大眉秀爲四善指纖掌軟紋如亂絲爲五善語聲  
小圓清如流泉爲六善笑不見睛口不見齒爲七善行步詳  
緩坐臥端雅爲八善神氣清媚皮膚香潔爲九善女人有此

九善爲邑封之貴也

女人九惡

蠅面爲一惡主妨夫結喉爲二惡主招橫禍蓬

頭爲三惡主下賤蛇行雀步爲四惡主貧賤眉逆而交爲五惡主窮下妨尅鼻上生勾紋爲六惡主妨尅招厄目露四白爲七惡主毒害凶狡雄聲爲八惡主剛暴再嫁旋毛生鬢爲九惡主頑賤尅子女人有此九惡不可同居矣

女人賢貴部

龍角纖纖細起直入髮際者后妃天中印堂

有肉環者后妃微者夫人伏犀隱隱而起者郡主龍角虎角輔角隱隱皆起涉入額者並主將帥夫人頭圓項短者主富額平而方者主貴眉長而秀者賢婦眼秀而清者貴閣鼻直如削者貴而多壽眉分八字者性和而福口細有稜者令婦

舌如蓮花者淑質唇如硃砂者令妻齒如石榴者命婦人中  
深又直者多子曰下潤澤者宜兒耳紅而圓者貴婦耳成輪  
廓者賢富生耳厚者先生男右耳厚者先生女唇多紋理者  
多子頤生重頤者富豪髮青黑如細絲者貴婦掌紅如綿者  
邑封骨細而肉膩者貴質肉潔體香者令相性緩氣柔者福  
壽神靜色安者貞潔笑而閉目者和美行而詳緩者淑麗掌  
中足底生黑痣者貴而益夫腋下乳間生旋毛者善生貴子  
矣

女人賤惡部 頭尖者下賤額狹者貧厄額角有旋毛者再  
嫁惡死額狹而髮垂者貧窮災禍髮捲攣及赤黃者窮下鬢  
蓬枯燥而麤硬者厄惡眉麤濃而逆生者妨夫產厄眉薄散

而頭交者重嫁害子目露而白者妨夫目深而偷視者奸私  
尅害目下有壅肉者死厄尅兒赤縷貫睛者產難目生三角  
者凶惡目大而平滿者淫邪瞻視不正瞳子橫者外情鼻陷  
孔露者貧下尅夫鼻尖曲者很毒貧賤人中平狹者無子兩  
頭頰高危者凶暴口如吹火者孤孀口如一撮者貧賤口大  
而綽者窮當三嫁口薄而尖者心懷毀謗唇薄如一字者下  
賤毒性唇起如龍嘴者尅夫惡死唇褰齒露者妨害壽夭唇  
青香黑者淫穢下賤耳反而垂者妨夫害子目小鰲黑者命  
短窮困面橫生拳骨者不良害夫蠅生麻點者孤窮尅子面  
凹面額窄者貧下額尖而鼻綽者賤苦項薄似馬面者妨夫  
項長結喉者自害手短面指禿者下賤貧苦足闊而脚薄者

寒窮奔波徧體生麤毛者性頑孤寡兩腋下生硬毛者身賤而  
下肉麤骨硬者一生寒賤皮薄而氣臭者百年窮苦聲雄而大  
者妨夫不良聲小而破者無財多破也掩口笑者外情搖膝坐  
者偷濫乳頭小狹者無子無財乳頭小白者絕子絕貴胸高臀  
凸者一生爲婢腰折而項癭者百年孤苦行如馬奔者妨夫下  
賤行如馬跳者奔波窮■頰赤而燥者性暴妨害氣濁而神昏  
者主多災厄目下有羅紋者殺夫害子目下有立理者孤孀無  
嗣額多橫紋者貧苦妨害臂有橫紋理者少寡無子目上斜紋  
者嫁必私逃井竈有紋者要必害夫有釣理者淫盜妨夫有立  
理者惡死人有橫紋者害殺夫十餘女人之相與男無遠更以  
前諸男子相一一推之貴賤吉

凶可自明矣

女富貴 鼻直如懸膽唇方口似胚眉疎并眼秀齒白更方  
頤耳聳垂珠軟神和色又怡額方分日月體白潤香肌坐穩  
如山立神嚴貌不卑莫言當自貴更主子孫奇

女貧賤 額窄又高眉唇掀口不齊面輕身鐵硬體薄更無  
威耳小垂珠淺鬢毛鼻骨低哭形須再嫁鬼臉定無兒淫光  
生眼角嫉妬更姦欺莫言今受苦晚歲更孤悽

婦人孤獨 婦人眼下肉常無不殺三夫殺兩夫見人掩口  
笑不斷愛逐行人半夜通

太清神鑑卷六終



羯鼓錄

欽定四庫全書提要

羯鼓錄一卷唐南卓撰唐書藝文志樂類載南卓羯鼓錄一卷然不云卓何許人雜史類又載南卓唐朝綱領圖一卷注曰字昭嗣大中黔南觀察使計有功唐詩紀事亦稱卓初爲拾遺以諫謫松滋令大中時爲黔南觀察使與唐書合當卽其人惟書中自稱會昌元年爲洛陽令又稱大中四年春陽罷免還自海南書錄解題又以爲婺州刺史均不相符然段安節樂府雜錄稱黔帥南卓作羯鼓錄亦與唐志合安節唐人必無謬悞疑書中所敘乃未爲黔帥以前事陳振孫所云則但據書中有至東陽之語以意斷爲刺婺州也其書分前後二錄

前錄成於大中二年後錄成於四年前錄首敘羯鼓源  
流形狀次敘元宗以後諸故事後錄載崔鉉所說宋璟  
知音事而附錄羯鼓諸宮曲名凡太簇宮二十三調太  
簇商五十調太簇角四十調徵羽闕焉惟用太簇者以  
羯鼓惟主太簇一均故也又有諸佛曲十調食曲三十  
二調調名亦多用梵語以本龜茲高昌疎勒天竺四部  
所用故也其李琬一條記耶婆色雞一曲聲盡意不盡  
以他曲解之卽漢魏樂府曲末有豔之遺法如飛來雙  
白鵲塘上行諸曲篇末文不相屬皆卽此例蓋樂工專  
門授受猶得其傳文士不諳歌法循文生解轉至於穿  
鑿而不可通也

羯鼓錄

守山閣叢書 子部

唐南卓撰

金山錢熙祚錫之校

羯鼓出外夷以戎羯之鼓故曰羯鼓其音主太簇一均龜茲部高昌部疏勒部天竺部皆用之次在都曇鼓答臘鼓之下

都曇鼓似帶鼓而小答臘鼓者卽羯鼓也○案太平廣記二百五引此注似作狀帶作腰太平御覽五百八十三亦作腰

鼓雞婁鼓之上譾如漆桶山桑木爲之○案桶字舊譌作相今据御覽廣記引改正下以

小牙牀承之○案以字舊譌作桶今据御覽廣記引改正擊用兩

杖其聲焦殺鳴烈○案御覽聲作音類說殺作急尤宜促曲急破作戰杖連

碎之聲○案舊脫作字今据御覽廣記補又廣記戰作戟又宜高樓晚景○案御覽晚作曉廣

記作明月清風破空透遠○案廣記破作凌夢溪筆談引作透空碎遠特異衆樂

○案廣記筆杖用黃檀狗骨花楸等木○案檀字舊作櫨注談特並作極云一作檀今据御覽

廣記並文獻通考一百三十六俱作檀  
知檀字非也又廣記椒作椒疑亦誤  
須至乾緊絕濕氣而

復柔膩乾取發越響亮膩取戰裏健舉  
○案御覽  
健作捷  
梔用剛鐵

鐵當精鍊捲當至勻  
○案御覽  
當作須  
若不剛卽應條高下撓捩不

停  
○案御覽通  
考擗並作紐  
不勻卽鼓面緩急若琴徽之尅病矣  
○案御覽卽作

則通考  
趙作頑  
諸曲調如太簇曲色俱騰乞婆娑曜日光等九十二

曲名元宗所製  
其餘徵羽調曲皆  
與胡部同故不載  
上洞曉音律  
○案上字唐  
語林引作明

皇由之天縱凡是絲管  
○案絲管御覽  
廣記並作管絃  
必造其妙  
○案御覽  
必作悉唐

語林  
作皆  
若製作諸曲隨意卽成  
○案唐語林此下  
有如不加意四字  
不立章度取

適短長  
○案御覽  
短長字倒  
應指散聲  
○案御覽  
散作發  
皆中點拍至於清濁

變轉律呂呼召君臣事物迭相制使雖古之夔曠不能過也

○案御覽不  
能作無以  
尤愛羯鼓玉笛  
玉笛之說見遺事○案  
御覽唐語林玉並作橫  
常云八

音之領袖

○案御覽此下有也字

諸樂不可爲比

○案此六字舊作不可無也今据御覽廣

記唐語林改

嘗遇

二月初

○案御覽遇作值

詰旦

巾櫛方畢

時當宿雨初

晴○案類說宿作春廣

晴

○案類說宿作春廣

景色明麗

○案色字舊作物今据御覽廣記類說改又唐語林

作氣六帖三

小殿內庭

○案御覽內庭字側

柳杏將吐

○案御覽

吐作含似誤

覩而嘆曰對此景物豈得不爲他判斷之乎

○案

唐語林作拆

左右相目將命備酒

○案唐語林命作令

獨高力士

遣取羯鼓

上旋命之臨軒縱擊一曲曲名春光好

○案此注

舊作自製者也今据御覽廣記唐語林改

神思自得

○案唐語林思作氣

及顧柳杏皆已發

拆上指而笑謂嬪御曰

○案廣記作謂嬪嬙內官曰

此一事不喚我作天

公可乎嬪御侍官皆呼萬歲

○案唐語林御作嬙官作臣

又

製秋風高

○案唐語林又下有宮字

每至秋空迴徹纖翳不起

○案御覽翳作羅唐

語林作埃卽奏之必遠風徐來庭葉隨下

○案六帖遠作秋廣記類說隨並作徐御覽唐

語林作墜又御覽下作落六帖作夜葉交墜

其曲絕妙入神例皆如此

○案御覽廣記絕妙

字並倒御覽入神下有也

汝南王璉

○案御覽五百八十三廣記二百五並作汝陽王

甯王長子也

○案舊脫長字今據

御覽廣記類說唐語林補

姿容妍美

○案美字舊譌審據御覽廣記唐語林改

秀出藩邸元宗

特鍾愛焉

○案元宗唐語林作明皇御覽作上

自傳授之

○案唐語林作授之音律

又以其

聰悟敏慧妙達音旨

○案唐語林妙作能又御覽廣記唐語林音並作其每隨游幸頃

刻不捨璉常戴研絹帽

○案璉字据廣記補又舊脫絹字下有案塵史作研絹帽七字乃注語混

入正文今考御覽廣記唐語林並有帽字類說作帽子不特塵史也据以補正並刪去原注

打曲上自摘

紅瑾花一朵置於帽上簪處

○案簪下舊有當是簪字四字亦注語混入正文今刪去考唐

語林正作簪御覽作著似誤

二物皆極滑

○案廣記句首有其字

久之方安遂奏舞

山香一曲

○案御覽香作花

而花不墜落

本色所謂定顛項難在不動搖○案廣記動搖字倒

未有也字類說唐語林並入正文類說下句作不容動搖也唐語林作樂家云定顛項難在不動搖

大喜笑

賜璉金器一厨因誇曰花奴

璉小字○案花奴上舊有真字注璉上有蓋字御覽真作貌疑

又注文御覽作璉一名也

姿質明瑩

瑩○案御覽瑩作媚

肌髮光細

案

御覽髮作膚

非人間人必神仙謫墮也甯王謙謝

謝作讓

隨而

短斥之上笑曰大哥不必過慮

○案必字舊作在今從廣記

阿瞞自是相

師上於諸親常自稱此號

夫帝王之相且須有英特越逸之氣

○案舊脫且字

据御覽廣記唐語林補

不然有深沈包育之度

一作厚○案不然下御覽有須字唐語林有則

字度字御覽類說並作候疑皆因厚而勢也

若花奴但端秀過人

○案唐語林端作英廣記作但

秀邁人

悉無此相

○案廣記唐語林相並作狀御覽作態

固無猜也

○案唐語林固故作故而

又舉止淹雅

○案廣記淹作閒

當更得公卿間令譽耳甯王又笑曰



○案廣記作又謝之若如此臣乃輸之○案廣記而曰御覽同無而字若如此臣乃輸之○案廣記上笑曰若

此一條○案二字御覽作則屬下句阿瞞亦輸大哥矣甯王又謙謝上笑

曰阿瞞羸處多○案御覽多有亦字大哥亦不用撝挹○案御覽挹

揖並疑誤衆皆歡賀○案御覽作歡笑也上性俊邁○案廣記上作元酷不

好琴會聽彈琴○案御覽會作嘗正弄未及畢叱琴者出曰待詔出

去謂內官曰○案御覽內官作官者疑宦者之謂也速召花奴將羯鼓來○案

林召作令爲我解穢

黃幡綽亦知音○案御覽五百八十三下有者字上嘗使人召之不時至上

怒○案類說下有甚字絡繹遣使尋捕○案御覽及廣記二綽既至及

殿側聞上理鼓固止謁者不令報俄頃上又問侍官奴來未

綽又止之曲罷後○案廣記後作復屬下句改奏一曲纔三數十聲綽卽

走入上問何處去來曰有親故遠適送至郊外

○案類說作坐送親故至

郊外廣記

上領之鼓畢上謂曰賴稍遲我向來怒時

○案類說作向

我怒御覽廣記時並作意屬下句

至必撻焉

○案御覽類說撻並作撻廣記作禍蓋亦撻之誤

適方

思之長入供奉已五十餘日暫一日出外不可不放他東西

過往

○案放字御覽廣記並作許

綽拜謝訖

○案廣記訖作畢

內官有相偶語笑

者

○案御覽語作而

上詰之具言綽尋至聽鼓聲候時以入

○案廣記聲作

而御覽同又候下有其字類說以作竟

上問綽

○案御覽綽作之

綽語其方怒及解怒

之際

○案廣記其作上

皆無少差

○案御覽作皆無差誤

上奇之復厲聲謂曰

○案廣記謂下有之字

我心脾肉骨下事

○案廣記無肉字御覽作我心骨內事

安有侍

官奴聞小鼓能料之耶

○案御覽安下有得字小鼓作鼓聲廣記聞作聽

今且謂我

何如綽走下階面北鞠躬大聲曰奉敕豎金雞

○案御覽奉作有豎字廣

記類說作  
監並誤

上大笑而止

宋開府璟雖耿介不羣

○案御覽五百八十三羣作倫

亦深好聲樂

○案唐語林作

音樂

尤善羯鼓

樂部行王詢云南山起雲北山起雨卽開府所爲也○案唐語林此注首有鼓字王詢作

亦知

云作曰末句作宋所作也曰南山下並人正文似誤

始承恩

顧與上論鼓事

○案唐語林作嘗曰與明皇論羯鼓事

曰不是青州石末卽是魯

山花養

○案唐語林作卽須又魯字舊謔會据御覽廣記二百五類說唐語林改御覽養作歐廣記作養下同

撚小碧上掌上須有朋

去聲

肯之聲據此乃是漢震

一作

第二

鼓也

○案三下舊注一作三廣記類說並作一且據下注明云第二鼓知三字一字皆誤也

且撚用石末

花養固是腰鼓掌上朋肯聲是以手拍

○案廣記拍作指

非羯鼓明

矣

第二鼓者左以杖右以手

又開府謂上曰

○案唐語林作開府又曰頭

如青山峯手如白雨點

○案御覽次如字作似

此卽羯鼓之能事也

○案

此句類說在碎急下  
御覽句首有案字  
山峯取不動  
案御覽取作欲  
雨點取碎急  
案

廣記碎  
上與開府兼擅兩鼓  
案上字上舊有卽字鼓下而

羯鼓偏好以其比漢震稍雅細焉開府之家悉傳之東都留

守鄭叔則  
案廣記則作明  
祖母卽開府之女今尊賢里鄭氏第有

小樓卽宋夫人習鼓之所也開府孫沆亦工之并有音律之

學  
案唐語林作亦知音  
貞元中進樂書三卷  
案唐語林作集樂錄三卷  
德宗覽

而嘉之  
案廣記之作焉  
又知是開府之孫遂召對賜坐  
案

御覽五百六十八賜作命  
與論音樂喜甚  
案御覽二字倒  
數日又召至宣徽張

樂使觀焉曰有舛誤乖謬  
案御覽廣記謬並作  
悉可言之

沈沈吟曰  
案舊脫沈吟二字據唐語林補  
容臣與樂官商榷講論具狀條

奏  
案具字舊誤其  
上使宣徽使教坊使就教坊與樂官參

議數日

○案日字舊謗月据然後進奏

○案廣記二字創

二使奏

○案

唐語林下

樂工多言沈不解聲律

○案御覽工作官律字御覽唐語林並作調又唐語

林多言沈下有

不審節拍兼有聾疾

○案廣記有作又唐語林疾作病

不可

議樂上頗異之又召宣徽使對

○案廣記作又宜召見又且

且

曰

○案御覽作沈曰

臣年老多病

○案廣記病作疾

耳實失聰若追於聲律

不致無業上又使作樂曲罷問其得失承稟舒遲衆工多笑

之沈顧笑者忽忿怒作色奏曰曲雖妙其間有不可者上驚

問之卽指一琵琶云此人大逆戕忍不日間兼卽抵法

○案此句

唐語林作

不宜在至尊前又指一笙云此人神魂已游墟墓

不可更留供奉

○案御覽廣記留作令

上尤驚異

○案唐語林作上大駭廣記同未有焉字

令主者潛伺察之

○案唐語林者作司

旋而琵琶者爲同輩告訐

○案廣記

旋作既輩字御覽廣記並作齊稱六七年前○案廣記其下有其字

父自縊○案唐語林父作母不得端由卽令按鞫遂伏其罪笙者乃愛

恐不食旬日而卒上益加知遇○案廣記作轉加欽重面賜章綬○案廣記

綬作服累召對每令沈察樂○案舊脫沈字樂工惴恐脅息不

敢正視沈懼罹禍辭病而退

嗣曹王皋精曉器用○案御覽五百八十三廣記二百五唐語林曉並作於爲荆南節

度使○案廣記南作州有羈旅士人○案御覽通考土人並作客懷二樁欲求通

謁○案唐語林懷作持樁上有鵝鼓二字類說作以二樁獻者先啓於賓府○案舊脫於字据御覽廣

記補觀者訝之曰豈足尙耶士曰○案御覽土作客但啓之尙書當解

矣○案御覽之及皋見樁見字倒無樁字捧而嘆曰不意

今日獲逢至寶○案唐語林但作此至寶也因指其剛勻之狀○案舊脫因字据御

覽補勻字賓佐唯唯。案唐語林作或腹非之皋曰諸公必

未信。案廣記唐語林必未字倒御覽作或未自命取食梓

○案廣記二百三十一作諸公心未信乎

三十一命作但自選其極平者遂置二椀於梓心。案廣記二百三十一作諸公心未信乎

御覽廣記類說置並作以油注之椀中。案御覽椀滿而油

不浸漏。案舊脫椀字据廣記二百三十一作寢蓋相契無際也。唐語

林作其吻。皋曰此必開元天寶中供御椀。案開元天寶中

合無際。皇不然無以至此問其所自荅曰。案御覽唐某先人在黔

中。案舊脫先字据唐語林補廣記無某字其二百三十一

與唐語林合御覽作某先生誤類說作其父蓋彙其辭

得於高力士之家衆方深伏。案唐語林賓府又潛問客。案

御覽府作佐廣記二百三十一客作士人下同直償幾何。案唐語林及廣記二百

首多其客曰不過三五百緡。案御覽無五字唐語林作二

價二字。案御覽無五字唐語林作二

萬及皋遺財帛器案御覽遺下有之字廣記二百一十一則作金唐語林皿作物其直

果稱焉案廣記二百三十一稱下有是字

廣德中前雙流縣丞李琬者亦能之案此三字類說作善羯鼓調集至

長安僦居務本里案御覽五百八十三僦作琬嘗夜聞羯鼓聲案舊脫嘗字據廣

記二百五補曲頗妙案舊脫曲字據御覽補於月下步尋至一

小宅門極卑隘案廣記門下有戶字叩門請謁謂鼓工曰君所擊者

豈非耶婆色雞乎一本作耶婆安雞案御覽雖至精能而

無尾何也工大異之曰君固知音者此事無人知某太常工

人也祖父傳此藝尤能此曲近張通孺入長安案御覽近下有因字廣

記作者並無通字孺作儒某家事流散案廣記某作其父沒河西

此曲遂絕今但按舊譜數本尋之竟無結尾聲故夜夜求之



○案廣記故作  
因未有也字  
琬曰曲下意盡乎工曰盡琬曰意盡卽曲盡

又何索尾焉

○案御覽  
焉作乎

工曰奈聲不盡何

○案御覽作奈  
何聲不盡也

琬

曰可言矣夫曲有不盡者

○案不盡御覽  
廣記並作如此  
須以他曲解之

○案

御覽須  
作當

方可盡其聲也

○案舊脫方字  
廣記補又御覽  
也作矣

夫耶婆色雞

當用樞柘急遍解之

○案廣記樞柘  
屈通考作掘

工如所教

○案御覽如  
下有其字類

說教  
作言  
果相諧協

○案御覽相作得  
舊脫諧字  
廣記類說通考補

聲意皆盡

如柘  
枝用

渾脫解甘州用急  
了解之類是也

工泣而謝之卽言於寺卿

○案言上舊有  
立字据御覽廣

記刪又廣記  
句首有而字

奏爲主簿後累官至太常少卿宗正卿

○案舊  
脫官字

又宗正卿三字誤作注文並据御覽  
廣記補正御覽宗正卿上有爲字

代宗朝

○案舊脫此三字  
据廣記二百五補

宰相杜鴻漸亦能之

○案廣記作  
亦能羯鼓

永泰中爲三州副元帥兼西川節度使

○案舊脫兼字据御  
覽五百八十三補

至成都有削杖者在蜀

○案廣記句首有李琬二字御覽止作削杖匠通考亦有匠字

以二

鼓杖獻

○案御覽有字連下句

鴻漸得之示於衆曰此尤物也當衣衾

中收貯積時矣

○案御覽當作常衾字御覽通考並作襟

匠曰某於脊溝中養者

十年

○案御覽者作字御覽通考並作襟

及鴻漸出蜀

○案舊脫鴻漸二字据御覽補至利州西

界望嘉陵驛路入漢州矣

○案舊脫路字据廣記補又廣記州作川

自西南來

西舊作蜀据御覽廣記改

始臨嘉陵江

○案御覽臨作會

頗有山水景致

舊脫頗字又景謫境並据御覽廣記補正

其夜月色又佳

○案御覽其作至乃與從事楊

炎杜亞輦

○案御覽楊炎作楊崖州廣記杜亞作杜悰

登驛樓望江月行觴讌話

○案廣記話作語

今日出艱危脫猜迫

○案御覽迫作逼

外則不辱命於朝

廷內則免中禍於微質

○案廣記二則字並作即御覽免作不

皆諸賢之力也

既保此安步又瞰此殊景

○案御覽瞰下有字廣記景作境

安得不自賀乎

遂命家僮取鼓與板笛○案御覽鼓上有羯字以前所得杖酣奏數曲

四一作西山猿鳥皆驚飛鳴噉噉○案御覽皆驚上有息而從二字廣記作皆驚飛噉走

事悉異之○案御覽曰昔夔之搏拊百獸舞庭此豈遠耶鴻

漸曰若某於此○案御覽稍曾致功○案御覽曾作當廣記功作力未臻尤

妙○案御覽廣記並作猶未臻妙尚能及此○案御覽廣記此並作是況至聖御天○案御覽

御覽廣記並作賢臣考樂飛走之類何有不感○案御覽又何不感

因言某有別墅○案某字舊作此近華嚴閣○案華嚴御覽廣記並作

花每遇風景晴朗○案廣記晴朗作清明明時或登閣奏此○案

廣記句首有卽字初見羣羊牧於山下○案御覽廣記山並作川忽數舉頭躑躅

不已○案舊脫舉字据御覽補某不謂以鼓然也○案廣記謂下有之

字及止鼓○案御覽羊亦止某復鼓○案廣記亦復然遂以

疾徐高下而節之無不應之而變

○案御覽應之作相應

旋有二犬自

其家走而吠之及羣羊側遂漸止聲仰首

一作逐聲俯仰

若有所聽

少選卽復宛頸搖尾

○案廣記卽作又

亦從而變態是知率舞固不

難矣

○案廣記不作無

其後乃不敢爲也

一本無此句○案御覽其作某也作之廣記無此句

其

近士林中無習之者

○案御覽近下者字中作聞

唯僕射韓皋善

○案皋舊善卓

据御覽廣記改

亦不甚露焉爲鄂州節度使時間於黃鶴樓一月兩

習而已

○案廣記間作聞御覽作聞黃鶴一兩集而已疑有脫誤自近士林至此舊合下會昌元年一節另起接

其文義似不相連今据御覽廣記並屬前節移正

會昌元年卓因爲洛陽令數陪劉賓客白少傅宴遊白有家

僮多佐酒卓因談往前三數事二公亦應和之謂卓曰若吾

友所談宜爲文紀不可令堙沒也時過而未錄及陝府盧尙

書任河南尹又話之因遣爲紀卽粗爲編次尙未脫藁至東陽因曝書見之乃詳列而竟焉雖不資儒者之博聞亦助資

筵之談話屬之好事庶幾流傳

○案類說幾作或

前錄大中二年所著四年春陽罷免旋自海南路由廣陵崔

司空爲鎮司空遇合素厚留止旬朔輒獻之過蒙獎飾因曰

宋沈卽某之中外親丈人知音之異事非止於此也嘗爲太

常丞

○案爲舊作謂据廣記二百三及唐語林改

每諸懸鐘磬

○案唐語林每下有言字

亡墜

至多補亡者又乖律呂

○案唐語林亡作之

一日早於光宅佛寺待漏

貞元中猶未有待漏院朝士多立城門衢中或立近坊人家及光宅寺也○案唐語林作忽因于光宅佛寺待漏

聞

塔上風鐸聲傾聽久之朝迴復至寺舍問寺主僧曰上人塔

上鐸

○案廣記作塔鈴

皆知所自乎曰不能知

○案唐語林下有之字

沈曰其

間有一是古製

案唐語林其間作某聞古作近

某請一登塔循金索

唐語

林一下有人字金作銓

試歷扣以辨之可乎

案舊脫試字据廣記補

僧初難後許

乃扣而辨焉寺衆卽言往往無風自搖洋洋有聞

案唐語林聞作聲

非此也耶

案舊脫也字据唐語林補

沉曰是耳

案唐語林耳伯也

必因祠祭考

本懸鐘而應也

案廣記也作之

固求摘取而觀之

案唐語林固作因

曰此

姑洗之編鐘耳請且獨綴於僧庭

案唐語林請且字倒

歸太常令樂

工與僧同臨之

案唐語林工作人舊脫臨之二字据廣記唐語林補

約其時彼扣本

樂懸

案舊脫本字据廣記唐語林補

此果應之遂購而獲焉又曾送客出

通化門

案唐語林出作至

逢度支運乘駐馬俄頃忽草草揖客別乃

隨乘至左藏門

案舊脫乃字門字据唐語林補廣記作乃隨乘行認一鈴言亦編鐘

也他人但覺鑄鑄獨工

案唐語林覺作見

不與衆者埒莫知其餘及

配懸音形皆合其度異乎此亦識微在金奏者與列於鼓錄  
則寢差矣以大君子所傳又精義入神豈容忽而不載遂附  
之于末

諸宮曲

太簇宮

色俱騰

耀日光

乞婆娑

大勿

大通

舞山香

羅犁羅

蘇莫賴耶

俱倫僕

阿箇盤陀

蘇合香

藏鈎樂

春光好

無首羅

鷓鴣嶺鹽

疏勒女

要殺鹽

通天樂

萬載樂

景雲

紫雲

承天樂

順天樂

太族商

蘇羅

棨利梵

大借席

耶婆色雞

堂堂

半杜梁

君王盛神武赫赫

君之明

大鉢樂背

大沙野婆

破陣樂

黃駿蹄

放鷹樂

英雄樂

思歸

憶新院

西樓送落月

撮霜風

九成樂

傾盃樂

百歲老壽

還成樂

打毬樂

飲酒樂



舞厥麼賦

太平樂

大酺樂

大寶樂

聖明樂

婆羅門

尉加那

萬歲樂

秋風高

回婆樂

夜半擊羌兵

香山

優婆師

匝天樂

禪曲

渡積破敵迴

五更轉

黃鶯轉

大定樂

越殿

須婆

鉢羅背

大秋秋鹽

栗時

突厥鹽

踏蹄長

太簇角

火蘇賴耶

大春楊柳

大東祇羅

大郎賴耶

卽渠沙魚

大達麼友

俱倫毗

悉利都

移都師

阿鷗鸞鳥歌

飛仙

涼下採桑

西河師子三臺舞

石州

破勃律

徵羽調與蕃部不載

諸佛曲調

九仙道曲

盧舍那仙曲

御製三元道曲

四天王

半闍麼那

失波羅辭見柞

草堂富羅

二曲

于門燒香寶頭伽

菩薩阿羅地舞曲

阿陀彌大師曲

食曲

雲居曲

九巴鹿

阿彌羅衆僧曲

無量壽

眞安曲

雲星曲

羅利兒

芥老雞

散花

大燃燈

多羅頭尼摩訶鉢

婆娑阿彌陀

悉駄低

大統

蔓度大利香積

佛帝利

龜茲大武

僧箇支婆羅樹

觀世音

居麼尼

眞陀利

大與

永寧賢者

恒河沙

江盤無始

具作

悉家牟尼

大乘

毗沙門

渴農之文德

菩薩緱利陀

聖主與

地婆拔羅伽

羯鼓錄終



羯鼓錄跋

唐元宗雅好羯鼓其時諸王大臣靡不習之汭及唐季猶有以絕技名者今鼓法不傳僅存厓略於南卓一錄而廣祕笈續百川學海諸本承譌襲謬幾不辯所語之云何偶檢御覽廣記唐語林類說等頗引羯鼓錄爲之參互校訂竝注其彼此異同於下客有見而笑者曰是雖譜錄類而體近小說吾子校以付梓過矣乃又屑屑焉掇拾襞積句櫛而字比之甚細不已甚乎予曰固也唐以前書百不存十此錄雖無關學問然如徐充暖姝由筆所舉敝聲一條亦足爲博覽之助又若明皇催花汝南王稱花奴宋璟論鼓事詞章家往往承用不可廢也諸書所引得失互見有不能定者義得兩存此則

校書之通例客何疑焉客笑而去因記其問答於此錫之甫  
漫書



